

Ш 9/2 = Ко/6-4  
к 87

Иван Коданев

а



ОЛЯЛӨН ШОНДИ



Иван Коданев



# ОЛЯЛОН ШОНДИ



ВИСЬТЪЯС, МОЙДЪЯС

Научная библиотека Сыкт ГУ



16713000153002

КОМИ КНИЖНОЙ ИЗДАТЕЛЬСТВО  
СЫКТЫВКАР 1972

к 57

С коми  
К 57

Коми гижысь Иван Васильевич Коданёв борья  
воясö гижö медсясö челядьлы. Коми издатель-  
ствоын петавлісны сылön сэтшöм книгаяс, кызди  
«Югыд войяс», «Вөр-ваод ветлігön», «Водз чеч-  
чан — унджык аддзылан», «Войвылö воис ту-  
лыс», «Тылön гусяторьяс», «Нимтöм шорьяс».

«Олялön шонді» нима книгаын дас көкъямыс  
висьт да кык мойд. Мойдьясас висьтавсьö сы  
йылысь жö, мый и висьтъясас — йöзлы бурöс  
вöчны коланлун йылысь, вөр-ванымöс радейтöм  
да лелькуйтöм йылысь, сиктса челядьлön удж  
да вильшасьöм йылысь.

Гижысьыс востö том геройяслысь олан сер-  
сö, олöм вылас видзöдлассö.

7-6-2  
44.72 м

90128

БИБЛИОТЕКА  
Сыктывкарского  
ГОСУНИВЕРСИТЕТА  
им. 50-летия СССР

88

## ВОЙНА ВОЯСО



**М**амө кувсьом бөрын ме во джын нин оли бабө ордын. Туй бокын быдмысь льом пу вылын быд асыв сылісны лэбачьяс. Көть муніс война, налы шог ни гөре.

Быд асыв ме петавлі өшинь улө, кыйөді, кор кутас локны аслас ыджыд сумкаөн почта новлөдлысь Огаш тьот: виччыси батьянь письмө, коді мөд во нин тышкасис фашистъяскөд.

И со гөрба Огаш сувтіс мян керка весьтө да чукөстіс менө. Менам өні на син водзын, кызди сійө дыр малаліс менсьым шырөм юрөс да небыдик гөлөсөн лөвтіс:

— Эк, Ольоксеевич, дона пи, лөк юөр өд Огаш тьотыд вайис. Некодөс тай проклятой пашистъясыд оз жалитны.

Письмөсө, кодөс ми бабөкөд уна лун нин виччысим, өні ме полі босьтны сы кийсь.

Гөлөс быртөдзыс бөрдіс бабөй. Бөрдісны рөдняяс, суседьяс: быдөн жалитісны менө. Көть ме мам моз жө радейті батьөс, а синвайөй өти войт эз усь, а мөд луннас пышйи гортысь. Та йылысь некодлы эг висьтав. Бабөлы коли письмө. Мися, сідз и сідз, муні фронт вылө. Кута лыйлыны найөс, кодьяс виисны муса батьөс. Сөмын сәк, кор нин саялі сиктөй, эг вермы кутчысьны, ыджыд гөлөсөн бөрддзи.

Куим лун чөж подөн лэччи карөдз. Гашкө, эськө и

веськалі фронт вылө, но рөкыд вылө аддзиси тани Пашка Гундыревкөд, кодi кольөм гожөм вөли мян сиктын тьöt-каыс ордын. Кор ме висьталi сылы ас йылысь, Пашка пырысьтөм-пыр ошкис менө:

— Буретш ме та йылысь жө думайта. И сукар нин дасьтi. Сөмын вот чойөс жаль эновтны. Бөрдны кутас.

Дыр ковмис кевмысьны сылы. Отнам кө мунi, гашкө, бурджык вөли.

— Пароходөн кывтны оз позь. Ме нин видли... Бөр бергөдiсны гортө,— велөдiс менө виль другөй.— Подөн мөдөдчам Котласөдз, а сәни...

Подөн кө и подөн. И сән жө шуим аски петны туйө. ...Некымын лун Пашка Гундыревкөд муним подөн сиктысь сиктө. Көнi корыштам, көнi уджыштам нянь ку-сөк вылө. Унджыкысьсө узьлим рынышьясын, пывсянь-ясын, виричьяс улын. Арся шондiс омөля лелькуйтiс мянөс. Войясы сулалiсны пемыдөсь, гажтөмөсь.

Рытьявылыс воим ичөтик сиктө. Сырзьөм паськөмъ-яс кузя виялiс нйит ва. Таркакылисны пиньясыным. Окота вөли сөйыштны, узьыштны. Но кытчө пыран, кодi виччы-сьө мян кодь «гөстьястө»?

Вөлөсьт помас сулалiс өтка ичөтик керка. Мөдөдчим сэтчө. Кыр горулас скөра мурзiс ю. Веж гыяс тойлалiсны өта-мөдсө, быттө ошйысисны асланыс вынөн.

Сувтiм керка весьтө. Пашка гыжйыштитiс пратьмөм нйит юрсисө, тувкнитiс меным бокө.

— Петька, куш юр, видзөдлы өшинь улас.

Пыр жө юрөс бергөдi веськыдвылө: векныдидик градъ-яс вылын быдмисны юмов галан, чөскыд морков, вижө-дөм корьяса лук. Кык сутки чөж нурьясьлытөм бөрын найө магнит моз кыкисны мянөс ас дiнас.

Некод некөн эз вөв. Недыр мысти ми куйлим нин град бөрөздаын. И сәки, быттө му пытшкысь, кыпөдчис кузь уска дядьө. Сийө чеччыштитiс ме дiнө, ён кияснас кватитiс шошаөд да горөдiс: «Ах, тэ яндысьтөм син!» Пашка тувк-нитiс потшөс костөд, пышйис вөрө. Пыртiсны шоньд кер-

каө. «Нөйтны кутасны»,— синваөй доршасис менам, вот-вот ырөбта бөрддза. Курччи паръясөс, виччыси тасмаөн швачкөбтөм. Но нөйтны көзяин эз кут. Сійө пуксьөдіс аскөдыс паныдөн, заводитіс юасыны. Ковмис висьтавны ставсө: и кызди батьөөс виисны фронт вылө, и кор кулі висьсыс мамөй. Сөмын эг висьтав немтор, кытчө ми мөдөдчим Пашкакөд.

— Война,— ыджыда ышловзис көзяин.— Мед эськө некор тиянлы сійөс не төдлыны.

Көзяинлөн гөтырыс вайис ужин: жаритөм картофпель, рыска йөв. Татшөм чөскыдасө ме важөн нин эг сөйлы. Узи джоджас, идзас вольпась вылын. Вөлі шоныд да лөсьыд.

Мөд луннас уска дядьө менө пуксьөдіс телегаө да петкөдіс төдтөм сиктысь. Ме видзөді стенөн сулалысь сьөд вөр вылө да думайті Пашка йылысь: «Көні сійө? Адзысьлам огө нин?»

Пемыднас нин воим ыджыд сиктө. Уска дядьө, кодлысь эг төд ним ни ов, пыртіс менө кык судта керкаө.

— Öндрей Степанөвич, со Петя Вагинөс вайи, мам ни батьсылөн абу,— шыасис сійө пызан сайын пукалысь мужичөй динө.

Сійө жө луннас менө нуисны детскөй домө. Вежон мысти татчө вайисны и Пашкаөс. Но сійөс регыд гортас босьтісны. А ме дыр кежлө овмөдчи выль местаө, адзди татысь бать да мам кодь жө төждысьысь йөзөс.



Костя воис гөститны сиктө пöльыс ордө.

— Карса вöлоганад тай, сөшайтöй, он ёнмы,— нюмъялис пöль.— Но немтор, лыясыд кө местаынöсь, яйыд туас.

Карса гөсть тöдмасис сиктса челядькөд — Колякөд, Полякөд да Öндрейкөд. Найö ставныс вöлины Костя серти зумыдöсь, гожъялөм чужöмаöсь.

— Мунам мянкөд видз вылө. Ой, лөсьыд сәни,— нуөдис выль другсö Коля.

— А рокыс да шыдыс кутшөм чөскыдöсь,— ошйысис Öндрей.

— А ме тшөтш юр кыскала,— көк моз шыасис Поля.— Кык лун сайын вөв вылысь усьли, а эг и доймы.

— Мукөд луннас сизимысь купайтчам,— öти бөрся мөд ошйысисны сиктса челядь...

Дедыс быттьö кывлөма налысь сёрнисö, рытнас шуис:

— Гашкө, аски видз вылө ветлан, озйөн чөсмасьыштан? Луннад сиктад сөмын пöчьяс да кагаяс. Гажтөм лөб. А номъясьыд эн пов. Тэ кодь гостөм динад найö оз матыстчыны.

Костялы быть. Он öд öткажитчы.

Мөд асывнас Костяөс чуксалисны водз. Пызан сайын унзильысла сөмын гоз-мөдысь паньыштіс рыська йөв.

— Костя,— нюммунис пöльыс,— тадзтö öд видз вылөдзыд он во. Но немтор, пажнайтігөн чожджыка панясьны кутан.

Водз асылын на воисны видз вылө. Паськыд ты дорысь Костя аддзис еджыд вонъяс. Сәсянь матын сулалисны ытшкан да куртан машинаяс, йирсисны вөвъяс. Костя ылісянь казялис выль төдсаясөс, кодъяс котөртисны сылы паныд.

Недыр мысти косяса, куранъяса войтыр кутісны ра-

зодчавны уджаланино. Костялөн пöльыс кык мужичöйкөд  
кольччис чöвтны. Выль ёртъяс пуксялисны вöвъяс вылö.  
На пиысь öти юалис:

— Кöсъян юр кыскавны?

— Усьö сийö вöв вывсьыс, он кö бурьыяс домав,—  
серöктис Поля.

Костялы эськö окота пуксьыны вöв вылö, но полö.  
Сэсся скöрмис нывка дэльöдöмысь, сöгласитчис.

Челядь здукөн доддялисны вöв, пуксьöдисны сы вылö  
Костяös, сетисны киас ньөр, мыччисны дом повод.

— Миян бöрся кутан ветлöддыны,— велöдис Коля.

Костя полигтыр вөрзёдис вöвсö, виччысис, медым эз  
усь, кöть пöрысь Карко öдва довгис. Коля да Öндрей со  
вайöны нин юръяс, а Костя пыр на шлапиктö-мунö зорöд  
дорсянь. А аслыс век жö любö: первойысь пуксис вöв  
вылö. Аддзылисны кö эськö карса другъясыс, завидысла  
потисны.

Кор медводдза юрсö Костя вайис зорöд дорö, пöльыс  
чуймис.

— Отсасян? Айда, Костя! Кавалерист дай ставыс.  
Будёновка да шашка сöмын оз тырмы.

Шондыс пыр ярмис, жар югөръяснас малалис вöв вы-  
лын пукалысь Костяös. Сылөн важөн сьумалис кынöмыс,  
но Карко вылысь лэччыны эз думайт.

Пажнайтигөн пöль да внук панясисны öти тасьтись.  
Пöльыс öтчид, Костя кыкысь удитас паньыштны. И сьöд  
няньтö мутшкö азыма. Рок тасьти ректигөн пöльыс шмо-  
нитыштитис:

— Со öд сиктса уджыд кутшöм пöльза сетö. Олан кö  
арöдз, багатыр лоан.

Рытнас карса гөсть мудзöмысла öдва воис сиктöдз.  
Но морös пытшкас пуис радлун. Гижис карö письмö:  
«Муса мамук! Ме уджалі видз вылын. Аски бара мунам.  
А кутшöм чöскыд шыдөн да рокөн вердöны...»

Костя унатор на кöсейис гижны, но унмовсис. Пöльыс  
босьтис моздорас да нуис сийös вольпась вылö.



Г алялы бура тѳдса колхозной фермаѳ туйыс. Сийѳ пѳшти быд лун воylvлѳ сѳтчѳ, отсасьѳ мамыслы дѳзьѳритны куканьясѳс. А куканьясыд дурны да котравны радейтѳны. Он кѳ видзѳд на бѳрся, пыр и разѳдчасны кытчѳскѳрѳ — корсь сѳсся найѳс.

Вѳлѳ гожа лун. Эз на удит Галя лѳччыны фермаѳ, кыдзи виччысьтѳг керкаѳ пырис мамыс. Чужѳмыс шѳйѳ-вошѳма, синьясыс гажтѳмѳсь.

— Ой, Галюш, Милочкаыд висьмис, оз сѳй ни ю. Кулас кѳ и...

Галялы пыр жѳ дум вылас уси сьѳд кымѳсас еджыд паса, вѳсни кокьяса раминик кукань.

— И ветфельдшерыд абу, курортѳ мунис. Вѳлѳ кѳ сийѳ, дерт, отсалис,— ышлолалѳ мамыс.

Галя мамыс моз жѳ шогѳ уси.

— Мамук, ме ѳнѳ жѳ лѳчча фермаѳ да лунтыр кута пукавны Милочка дорын. И турун сылы вая, медся чѳс-кыд бобѳнянь чукѳрта. Сийѳ ѳд бобѳняньтѳ зѳв ѳна радейтѳ.

— Ме, сѳдзкѳ, мукѳд куканьяссѳ нуѳда йирсыны, а то тшыгѳсь, баксѳны коньѳрьяс,— долыдмис мамыс.

Галя босьтѳс вель ыджыд нянь шѳрѳм, кисьтѳс кринчаысь сулея тыр йѳв да мѳдѳдчис фермаѳ. Лѳччигмозыс борйысь нетшкис моздор тырыс бобѳнянь.

Милочка куйлис кос идзас вылын картабердса йѳрын. Нывка вель дыр малалис-шыльѳдис сийѳс. Милочка весиг юрсѳ эз лѳптыштлы, синьясыс гудырѳсь, омѳльтчѳма. Галя мыччис куканьлы выя нянь, мѳдыс весиг эз исышт.

— Ме ѳд тѳда, любитан тѳ выя няньтѳ. Мыйла нѳ он сѳй? Тадзнад дзикѳдз омѳльтчан. Гашкѳ, бобѳняньсѳ видлан?



Милочка исыштіс чөскыд көра турунсө, но вомас эз босыт.

Кытысыккө нем виччысытөг кукань вылө усыкөдчисны лөдзьяс. Öвтыштас нывка чышъяннас, пышйыласны и здук мысти бара нин пуксялөны, дөзмөдөны висысысөс. Галя котөртліс карта пытшкө, аддзис мамыслысь важ плащсө, вевттис Милочкаөс.

Рытөдзыс бергаліс Галя висысыс дорын. Кымынысыккө кевмысис, медым йөвсө көть юас, но Милочка эз кывзысь. Шог лои нывкалы, нинөмөн оз вермы отсавны куканьлы. Кыдз нө, эськө, көть неуна вердыштны? Босытіс йөв тыра сулеясө, паськөдыштіс кияснас куканьлысь вомсө и ичөтикаөн пондіс кыстыштавны йөвсө. Милочка туп-тяпкерис вомнас: горшыс, тыдалө, ёна косьмөма. Юыштіс йөвсө.

— Айда тэ, дженьыд сюр. Сөйны кө кутан — бурдан, — нывкалы зэв любө лои.

Сэсся кукань нямлялыштіс и китыр бобөнянь. Галя кутлө сійөс сылі гөгөрыс, малалө небыд гөнсө.

Локтіс мамыс, куканьясөс вайөдіс. Ёна и ошкис Галяөс.

Та бөрын нывка быдса вежон чөж на бергаліс да вердіс-юкталіс висысыс куканьөс. Нянь да йөв сылы гортсыс ваяс, медчөскыд турунсө новлас. Весиг кор нин Милочка сувтіс кок йылас, Галя пыр сы дінын бергаліс. Милочка водас шойччыны, нывка сы дінө пуксьө. Кукань видзөдө сы вылө аслас ыджыд синьясөн да быттьө көсйө шуны: «Аттё, бур нылөй. Кок йылө менө бөр сувтөдін».

Кызкө өтчыд Галя лэдзис йөрысь куканьсө. Рытъя-вылөдзыс йирөдіс веж луд вылын. Фермаө бөрсө локтігөн на вылө виччысытөг вуззысис сиктысь медся лёк понйыс, Султан. Щөтьсө лэптөма, эралө. Галя ёна повзис, заводитліс пышйыны. Но пон здукөн суөдіс, вот-вот курччас, косявлас платтьөсө. Нывка тэрыба кайис потшөс вылө, кутіс бөрдны. Милочкалы, тыдалө, жаль лоис аслас ичөтик көзьяйкаыс, лэдзис юрсө увлань, дженьыдик сюръяссө весь-

көдіс лёк пон вылө. Султан, буракө, тайөс эз виччысь, че-  
пөсийс бөрвыв. Милочка сы бөрся. И вель ылөдз вөтчыліс.  
Сэсся бөр бергөдчис повзьём нывка дінө, нюлыштис сы-  
лысь көмтөм коксө, гожъялөм сойсө.

— Аттё тэныд, Милочка. Не тэ кө, пурис менө лёк  
Султаныд.— И нывка меліа сывйыштис куканьөс голя-  
өдыс.

## ВЕЖЫСЬ ЛОӨ



**К**оля Матевлөн батыс тракторист. Совхозын  
уджалө. Тулысын и гожөмын, арын и тө-  
лын сійөс пыр позьё аддзывны трактор вы-  
лысь. Тулыснас гөрас-көдзас, пуктас карту-  
пель. Сэсся небзьөдас картофель муяс, ёг  
турунъясысь весалас. Гожөмнас, кор воас турун пуктан  
кад, тракторөн жө ытшкө. Пуксяс ар — бара нин муяс  
вылын, картофель керө, силосуйтчө. А совхозлөн му-видз-  
яс зэв уна, колө ас кадө сійөс гөрны-көдзны, ставсө бура  
идравны.

Батыс локтө гортас мудз. Колялы жаль овлө. Сэтшөм  
окоата отсавны. Но оз на вермы, ичөт да.

— Батё, менө тшөтш босьтлы, отсышта көть!— вөз-  
йысьө Коля.

Батыс нюмъялігтыр кутыштліс писө:

— Вот быдман шкап судта, помалан школа и батыд  
моз жө трактористөн лоан. Сэки и позьё шойччыштны  
меным.

Кор воис тулыс да муяс вылысь сыліс став лымйыс,  
Коля батысө сёр рытын сөмын и аддзывліс. Гажтөмчө  
лунтырнад зонка. Отчыд сэсся и шуө мамыслы:

— Мамө, вай ме батыөлы сёян катөда.

— Катод эськө да,— шуис мамыс,— сөмын эн ылав некытчө.

Коля босьтис ичөтик сумка да котөрөн модөдчис ыб-лань. Кор кыпөдчис джуджыд мыльк вылө, кытысянь төвнас лыжиөн иславлөны, аддзис батыслысь тракторсө. Трактор вылас дөлалис гөрд флаг.

Детинка кутис өвтчыны кинас да мый вынсьыс горзыны:

— Батьө-ө-ө! Тайө ме, Кольө! Сувтлы!

Трактор кывзысьыс вөв моз жө сувтис.

Коля котөртис сэтчө, кавшасис-кайис ичөтик кабинаө да батыслы мыччис тубрассө.

— Сөян вайин?

— Вайи...

— Вот и молодец, бать вөснайд төждысян.

— Ме быд лун понда ваявны... Толькө тэ менө велөд тракторсө новлөдлыны.

— Ок тэ, тракторист!— долыдпырысь шпыннялө батыс.

— Батьө, а флагсө нө эськө мыйла өшөдін трактор вылад, талун өд абу празник?

— Медся уна гөри, да сійөн сетисны.

— А мам оз на и төд,— радліс Коля. Сэсся кутис кевмысьны батыслысь, медым лэдзис пукуштны аскөдыс орчөн да видзөдыштны батыслысь гөрөмсө.

Ая-пия куим кытш вөчисны паськыд му гөгөр. Уна амысьяса плуг, коді вөтчис трактор бөрся, ас бөрсяыс колис паськыд сьөд визьяс. Батыс меліа видзөдліс пиыс вылө да висьталіс.

— Сэсся кодзам татчө анькытш да зөр. И мичаа веждасны муяс.



Лунъясыс сулалісны мичаоьс, шоныдөсь. Мишалон бать-мамыс асывсянь рытөдз уджалісны совхозын. Галя чойыс велөдчис школаын. Сөмын Миша да бабыс лун-лун олісны гортын.

— Аски ми муяс вылө мунам,— школаысь локтөм бөрын юөртіс чойыс.— Картопель кутам өктыны.

— А машинасө аддзылад, коді пө тай ачыс картопельсө керө?

— Комбайн сылөн нимыс,— висьталіс чойыс да содтіс:— Аддзылам, дерт.

— Ме ветла жө, Галя.

— Нинөмла.

— Босьт, Галюш,— сьөлөмсяньыс вөйысис Миша.— Мем окота жө видзөдлыны, мыйсяма машина.

— Ог, ог! Сөмын кутан мешайтчыны.

Забеднө лои детинкалы, доршасис синваыс.

Мөд луннас Мишалон бать-мамыс бара мунісны удж вылө. Муяс вылө кутіс лөсьөдчыны и Галя. Мишалы лои ещө нин шог.

«Кор ме быдма, Галинаөс некытчө жө ог босьт»,— зумыштчөмөн пукаліс сійө.

— Но ме муні, Мишук. Сөяныд пызан вылын. Ывлаө кө петан, кильчөтө восьсөн эн коль.

Муртса на Галя петіс керкаысь, а Миша тэрмасьөмөн петіс нин. Юрас пуктіс кузь лентаяса матросскөй бескозырка, зептас суйыс кык нянь шөрөм да айда школалань.

Челядь сулалісны нин стройын. Кианыс налөн корзинаяс, ведраяс.

— Шагом ма-арш!— горөдіс учитель, и велөдчысьяс сьылгтырйи мөдөдчисны бусөсь туй кузя.

Миша гусьөникөн вөтчис челядь бөрся. Поліс: мед эз

казяв чойыс. Регыд мыччысисны паськыд муяс, кодлөн оз тыдав пом ни дор. Учитель, кылө, мыйкө висьталіс, и велөдчысьяс разөдчисны му пасьтаыс да кутісны зіля чукөртны картупель.

Миша ылітікодь кытшовтіс да пуксис неыджыд мыльк сайө. Заводитіс гөгөр дзөръявны: оз-ө көнкө тыдовтчы картупель керан комбайн, кодөс неважөн на вайисны татчө. Мыччысис шонді, ывла вылын лои быдсөн гажаджык. Небыдик төв гильөдіс Мишалысь беринөсь чужөмсө. Пукаліс сійө тадзи вель дыр, весиг гажтөм лои. Сэсся кыскис зепсьяс нянь шөрөм да заводитіс сёйны. А шонділөн югорьясыс сідзи баййөдлісны детинкаөс. Синьясыс частө кутісны куньявны. Миша унмовсис. Нянь шөрөмыс уси кисьяс.

— Эй, моряк! Тэ нө мый узян?— кодкө, кылө, чукөстіс, сійөс.

Миша восьтіс синьяссө. Сы дінын сулаліс совхозса бригадир Иван Гаврилович да нюмъяліс.

— Ставыс уджалөны, а тэ лун шөр лунө узян. Тадзтө абу төлка, Михайлө Алексеевич.

— Дядя Ваня,— синьяссө тілыштіс Миша.

Бригадир грөзитыштіс кыз чуньнас.

— А няньтө колө сёйны. Он и төдлы, шырьяс пышйөдасны.

Миша мыйкө көсйис на шуны, но Иван Гаврилович восьлаліс нин водзө. Миша чеччис, лөсьөдыштіс бескозыркасө, муніс велөдчысьяс дінө да тшөтш кутіс чукөртны картупель. Уджаліс зіля. Недыр мысти Мишаөс аддзис учитель.

— Тэ нө коді?— меліа юаліс сійө.

— Моряк!— гораа вочавидзис Миша.— Менам и матросской шапка со эм.

— Аддза, мый моряк. А нимыд кызди?

— Мишка,— ещө на збойджыка вочавидзис детинка.

Откымын велөдчысьяс матыстчисны на дінө.

— Тэ, сідзкө, уджавны локтін?— детинкаос ошкис учитель.— Молодец, молодец!

Миша динө котөрөн локтис чойыс да кутис видчыны.

— Эн вид воктө,— өлөдіс Галяос учитель.— Аддзан, кутшөм зіль сійө. Совхозлы отсасьö.

Ошкыштөм бөрад детинка ёнджыка зільмис. Рытъя вылөдзыс сійө уджаліс челядькөд отлаын. Гортас лэччигөн нин Галина нуөдліс Мишаос картупель керан комбайн динө, кодос сылы сэтшөм окота вөлі аддзывны.

Дыр видзөдісны чоя-вока ыджыд да вына машина вылө, коді ветлөдліс паськыд му кузя.

— Вот тайө машина! Меным кө эськө пуксывны сы вылө,— дивуйтчис Миша.

— Кор быдман, не татшөм машинаяс на лоасны миян,— вочавидзис та вылө чойыс, сэсса босьтис ичөт воксө киөдыс да котөрөнсорөн мөдөдчисны гортаныс.

## ОЛЯЛӨН ШОНДИ



**М**аша Канева пукаліс восьса өшинь дорын да тэрыба киллис семечки. Китырыс вөлі семечкиыс, но вочасөн колис пыр этшаджык и этшаджык. Буретш сэки Маша керка весьтөд восьлаліс сылөн пөдругаыс Оля. Сійө Машакөд велөдчө оти классын, нельөдын.

— Машө, мый нө керкаын пукалан? Ветлам библиотекаө,— шыасис Оля.

— Дыш. Менам воддза книгагасыс на лыддытөмөсь. Төд, мый сөя?— Ошинь курич бокө кокъяссө өшөдіс Маша.

— Семечки тай киллян. Төді?

— Аха. Бабё быдса стокан вайис карысь. Сомын жариттом. Пырав, и тэныд сета. А то этша нин коли.

— Вай кымынкө тусь либё,— дзик өшинь дорас матыстчис Оля да нюжөдіс кияссө.— Шыбит, кута.

— На, лосьод китө. Водзджык кө локтін, унджык сеті.— Маша тэрыба мөдіс шыблавны семечки тусьяс Олялы кияс, сэсся недыр мысти вочавидзис.— Абу сэсся. Мый эг удит сёйны ставсө, сеті.

— Аттьө, Машук.

Оля гартыштіс семечки тусьяссө носөвөй чышъянө да суйис платье зептас.

— Гортад өмөй нуан?

— Да. Ме найөс град вылө пукта,— кыліс Олялөн вочакыв.— Мед быдмасны сэтшөм жө мичаось, кызди найө кольөм во быдмисны учительница град йөрын.

— Чайтан, быдмас? И менам колөма пуктыны.

— Колөкө, бөр сета,— чургөдіс кисө Оля.

— Мыйла? Оз ков. Сеті да бөр ог жө босьт.

Сійө жө рытнас Оля босьтіс кияс кокан, небзьөдіс ичөтик гөгрөс град да Машаөн сетөм семечкисө пуктіс радөн-радөн, өта-мөдсянныс костөн. Сэсся кияскаліс градсө шоныд ваөн.

Колис тулыс, пуксис нин гожөм. Лунъясыс лоины ещө на шоныдджыкөсь. Оля вель тшөкыда петавлө град йөрас, весалө посныдик быдмөгъяс гөгөрысь ёг, кияскалө градсө. Корскрө вунөдлас петавны град йөрас да повзяс быдөн, мед эськө эз жө кувны пуктасъясыс. Но семечкияс вөліны винёвөсь, көть надзөникөн, но кыпөдчисны вывлань.

«Өдйөджык нин быдмөй, ме тиянөс со кызди лелькуйта»,— кевмысис вөсни кока подсолнухъяслы Оля да бара заводитіс небзьөдны ассыс градсө.

Зэрыштөм да шондөдыштөм бөрын подсолнухъяс өдйө кутісны кыпөдчыны вывлань, кокъясныс кызісны, лэдзисны шочиник паськыд листъяс. Олялы любө. Унаысь нин воліс пөдруга дорас и Маша.

— И мыйла ме эг тшөтш пукты подсолнухтө, öнi эськө тэ моз жö нимкодяси.

А лунъяс мунисны, гөнитисны öдйö котөртгысь вöv моз. Кыдзкө водз асывнас Оля петис град йöрас да радысла муртса эз горөд. Подсолнухъяс вылын öшалисны тасьтi кодь гөгрөс кытшъяс. Некумын луң мысти подсолнухъяс заводитисны дзоридзавны аслысыяма мича рөмөн. Оля нюжөдлас кисö вывлань да оз и судз, сы джуджда быдмисны найö. Посныдык семечкиясысь со кутшөм багатыръяс кыпөдчисны. Весиг сиктса йөз, кор прöйдитлисны Оля керка дортi, быдөн бергөдчөмөн видзөдисны да нимкодясисны нывка быдмөгөн. А совхозса бригадир Антип дядь аддзис Оляөс град йөрсьыс да дыр ошкис нывкаөс.

— Айда, дзоля Олюк. Град йöрад тэнад, майбырлөн, аслад шондi эм. Абу öти, а быдса дас.

Антип дядь мунөм бöрын Оля котөртис туй вылө, сувтис сийö жö местаас, көни дзик на неважөн сулалис бригадир, сэсся заводитис видзөдны град йöрас. Подсолнухъяс и збыльысь вöлины шондi кодьöсь, гөгрөс юраөсь, тыдалöны ылөдз. «Вот эськө Маша кө талун на вылө видзөдлас. Куымын морт со любуйтчö мича быдмөгъяснас»,— ас кejas сёрнитис нывка.

Öдйö и коли гожöмыс. Воис ар. Лунъясыс лоины зумышöсь, вель тшөкыда зэрлывлис. Олялөн град йöрас эз нин тыдав шондыс. Подсолнухъяс вылын гөгрөс жырйын öнi тыдалисны уна сё семечкияс. Лунысь-лун найö пондисны сьöдöдны.

Сёр арын нин Оля быдмөгъяссö пыртис гортас. Ыджыд тасьтi тыр чукөрмис семечкияс. Машаөс да чойвоксö сийөн гөститөдис и, ачыс чөсмасис и. Эз весьшөрö вош ичөтик нывкалөн уджыс.



А сывнас Лена лэччис ю дорö. Поводдяыс шоныд да лөнъ. Берегдорса эрдъяс вылын сярвидзисны быд сикас дзоридзъяс. Кыр йылын сулалысь ниа пу дорысь öвтчис чöскыд көр. Сувтан татшөм пу дорас — мунныд абу окота.

Пуксис Лена кыркöтш нöрысö да кутис видзöдны лөнъя визувтысь Эжва ю вылö. Шондi югөръяс улын лöстало быдсөн ва веркöсыс. Ю кузя, öта-мöд бердас топöдчöмөн, кывтöны керъяс. Лена тöдö, оз нин ковмы налы ылöдз кывтны: регыд керъясыс веськаласны запанъ көшельö. Запаняс Лена волывлис, вокыс сэнi вөр пурьялö.

Лена бергöдчылис бөрвыв да аддзис ассыс сиктсö. Вель дыр корсис синъяснас тöдса керкасö, но сiдзи и эз аддзы. Кытысь аддзан та мында керкаяс пытшсыс. Кöс-йö нин вöли бөр кайны сиктö, дыр гуляйтны оз позь: мамыс тшöктис лук град весавны. Чеччис, пыркнитис сарапан мышсыс ёг турунъяс, и буретш сэки матыса вөр дi дорсянь кылис көклөн тöдса гөлöс. Лена, көть сийöс и эз аддзы, а көкөмсö кылис бура. Нывкалы дум вылас уси орчча керкаса Öгрö пöчлөн кывъясыс, быттьökö пö көк кужö висътавны, кымын во быд морт олас му вылын.

— Көкө, көкө, висътав, кымын во ме ещö ола? — кыз вермис, гораа горöдiс нывка, сэсся чошнитис пельяссö да сюся кутис кывзыны. Көк быттьö кылис нывкалысь гөлöссö, ещö на гораджыка вочавидзис.

— Кук-ку...

— Öтик, — көк бөрся пыр жö мöдiс лыддъыны Лена да, медым оз сорлась, кусыньтис кисыс öти чунь и кутис бара кывзыны пельяссö чошнитöмөн. Но көк быттьö виньдiс, та бöрын мöдысь эз нин горöдлы.

Лена кевмысьö көклы, нормöм гөлöсөн горзö.

— Көкөй, муса көкөй! Мыйла нө ланьтин! Сет гөлөстө, мем өд зэв уна во окота овны!

Но көк чөв оло, оз көсйи шыасыны. Нывкалөн синваыс доршасьё, места вывсьыс вөрззынысё оз лысьт, пыр на виччысьё, надейтчө көк вылө. Гашкө, быдса час сулаліс берег дорын шогө усьём ныв. Бөрдигтырйи и кайис гортас, рытөдзыс эз сөй ни ю. «Збыль өмөй меным регыд кувны ковмас?»— өтторья лөвтө нывка. Эз весиг петав лук градсө весавны. Ставыс өні сылы веськодь. «Мед көть мамө да чойө видз вылысь өдйөджык локтасны, а то кула да ог и аддзыв найөс».

Шогсис да бөрдис ичөтик нывка, эз вермы виччысьны гортасяссө, пунктис юрсө пызан вылө да сідзи и унмовсис.

Коді төдас, дыр-ө узис. Садьмис мамыслөн чуксалөмысь.

— Ленуш, эн-ө нин висьмы, оз тусь? Ропмунөмыд, нинөм со лунтырөн абу сөйөмыд. И лук градтө абу весалөмыд. Мый тэкөд?— Небыд юрсиөдыс малаліс сийөс мамыс. Орччөн сулаліс Юля чойыс.

Лена жебиник кияснас сывйыштіс мамсө да ыджыд гөлөсөн бөрддзис, вель дыр немтор висьтавыны эз вермы. Сэссия тай коркө петіс жө кывйыс.

— Кула ме, мамук, регыд. Он верит? Көк мем талун асыв висьталіс. Кор юалі сылысь, дыр-ө ме кута овны, дзик өтчыдысь и көкыштіс. А мем сэтшөм окота овны. Öгрө пөч тай висьталіс меным, көкыд пө быттө төдө, кымын во олас мортыд.

Юля чойыс сэтшөм гораа серөктіс, весиг Мурка кань повзис да уськөдчис паччөрө, быттө шыр бөрся вөтчис. Серавны кутіс и мамыс. Лена дөзмис, ку пиас оз төр. «Сідзкө, ни мамө, ни чойө оз жалитны менө, радлөны, медым өдйөджык кула»,— скөраліс сийө думнас.

— Эк тэ, йөюк! Позьё өмөй быд сөрөмлы эскыны, торйөн нин Öгрө пөчлы,— топөдліс ён кияснас Ленаөс чойыс.— А көкыд өд көк и эм. Сылөн мывкыдыс Öгрө пөч мында жө.

Мамыс содтіс :

— Дыр кө көсьян овны, колө отсасыны бать-мамыдылы, а не шогсыны да бөрдны. Удж радейтысь мортыд медся дыр му вылас олө. Некутшөм көк сылы оз мешайт.

— Сідзкө, Öгрө пөч пөръяліс менө? И көкыд пөръяліс?— радпырысь нин шысасис Лена.— Талунсянь некор ог кут налы эскыны. Ог, ог, ог!— дзодзөг моз артмис ныв-калөн.

Мөд луннас Ленаөс быттьө вежисны. Чеччис водз. Ичөтик ведраөн, гашкө, дасысь вала ключө котөртліс, лук град весалис, джоджсө мыськаліс, ыжъяслы сөян вайис, тасьті-паньяс мыськаліс.

Локтіс мамыс удж вылысь да ёна и шензис зіль ныв вылас.

## ПИРОЖНОЙ



Андрейлөн мамыс ветліс магазинө. Муртса на сійө удитіс пырны гортас, детина уськөдчис паныд.

— Мам, мый вайин?

— Пирожной,— вочавидзис мамыс.

Сэсса куим пельө вундіс пирожнойсө да торйөдіс өтамөд дінсьыс.

— Тайө тэныд,— медыджыд торсө сетіс Андрейлы, а мөд кыксө пуктіс шкапө.— Тайө — Валялы, а тайө — бабыдлы.

— А тэныд?

— Меным мөдысь ньөбам,— серөктыштіс мамыс.

Детинка вывті лои рад. Сійө котөртіс орчча комнатаө, көсйис ошйысьны бабыслы, но сійө буретш унмовсьөма.

Андрей курччыштіс пирожнойсө өтар дорсянь, сэсса

мөдар дорсянь. Тадзи сійö видлаліс, видлаліс — и пирож-  
нөйыд лым моз сылі.

Кор мамыс муніс уджавны, Андрей некымынысь  
восьтыліс шкапсö.

— Тайö Валялы, а тайö бабöлы,— тарелкаö чунь  
помнас тувкөдіг шуаліс сійö.— Мыйла мамö унджык абу  
нбөбма?

Баб садьмытөдзыс Андрей унаысь на видзөдліс чös-  
кыд пирожнөй вылө.

— Öтиыс Валялы, мөдыс бабушкалы,— вомгорулас  
сёрнитіс сійö.— Ассым абу колöма сөйны, а то öні нинö-  
мөн ошйысьны Мишкалы.

Рытьявылыс гортö чукөртчисны ставөн. Мамыс воис  
удж вылысь, Валя — школаысь, а Андрей — гуляйтан-  
інысь.

Мыйөн пузис самöвар, мамыс шуис Валялы:

— А ме тiянлы асывнас гөснеч вайлі.

— Мый, мый сэтшөмыс?— радліс Валя.

— Восьты шкаптö да аддзан. И бабушкаыдлы тшөтш  
сет.

Валя восьтіс шкапсö да долыда горөдіс:

— Пирожнөй! Пирожнөй!

— Сэні жö кык вөлі. Морт öтиөн бабушкаыдкөд тiян-  
лы кольлі.

— А тані öти. Со көть видзөдлы.

Андрей дзевсис джуджыд самöвар сайö. Пукалө, чуш-  
көдчө нырнас, быттьö ва вомөн варччö.

— Ме тай эг босьтлы-а... Гашкө, Акбар жөритіс,—  
кань вылө ыстысис детинка.— Аски ме сійöс лунтыр  
жугъян улын видза, вот сылы и пакөститчөм.

— Кыдз нö кань сөйис, кор сійö коймөд лун нин абу  
гортын?— шыасис бабыс.

— Сідзкө, Соболь пыраліс,— ещö на улөдз копыртіс  
юрсö Андрей.— Ок, кыдзи любитö сійö пирожнөйтö.

— Понлы тöрас,— дзормыштөм юрсö копыртліс  
бабыс.

— Гашкө, другъясыдлы сетін?— съод синъяссө чөвт-  
ліс вокыс вылө Валя.

Андрей пырысь-пыр жө варовмис да лои збойджык.

— Бабушка узигкості Мишка воліс. Төдөмысь, сійө  
шкапад пыраліс. И чунь помсө вөлі нюлө.

Мамыс букыштчыліс Андрей вылө.

— Ланьт.

Чай юом бөрын мамыс петіс идрасыны. Бабыс пызан  
йөрсыыс судзөдіс югъялан дорыша өчки да пуктіс ныр  
йылас.

— Öчкий, өчкий, видзөдлы гөгөр, он-ө тэ аддзы  
миянлысь вошөм пирожнойсө.

Андрей көсийс дзевсыны дзирдалан өчкиысь, йөр-  
шитчыны пельсө, но эз удит.

— А со тай, Öндрей кынөмын пирожнойыд тыда-  
лө,— нюмъөвтіс бабыс.

Детинка пель йылөдзыс гөрдөдіс. Валя гусьоникөн  
сераліс да мудера видзөдіс вокыс вылө.

— Ме... Ме сөйи сійөс. Эг көсий, да сөйсис...

## ДРУГЪЯС



бедайтігөн Филипп некидз эз вермы пукав-  
ны өти местаын. Бергаліс, жөдзис, быттьө  
ёсь шылаөн чуткалісны бокас. Быд паньыш-  
төм бөрын чошкөдліс пельсө, видзөдлывліс  
өшинь улас.

Кор мамыс вайис кухняысь чөдъя кисель, Филипп  
курчавтөгыс нылыштіс котлеттор, көсийс пышйыны пы-  
зан сайысь, но кыліс стрөг гөлөс.

— Пукав, кисель сета.

Сійö видзöдліс лöз тасьтi вылö, унаысь нюлыштiс вом дорсö, нö сёйны эз кут. Поліс öтиторйысь: другъясыс мунасны чери кутавны, колясны öтнассö.

— Менам кисельсьыд кынöмöй висьö, — тэрыба нурбыльтіс Филипп да öдйö вешйис пызан дорысь.

— Висьтав пу йылысь тури. Гашкö, и юрид тшöтш висьö? — шуасис мамыс.

Эз на удит Филипп корсьны картузсö, мамыс восьтіс сундук да мыччис сылы выль дөрöм, кодöс вурис тöрыт рытнас.

— На пасьтав, а то шыш кодь ветлан. Йöзыс дивитасны.

Коді нö öткажитчас выль дөрöмысь? Филипп пасьталіс, видзöдліс зеркалö пыр и радысла муртса эз горöд. Сэ-тшöм лöсьыда пукаліс сы вылын выль ситеч дөрöм.

Öти здук мысти Филипп төвзис нин другъяс дінас. Шырöм юра Лёша да тури кодь вöсни кокъяса Коля дыр видзöдісны Филипп вылö. Лёша — любуйтчис, Коля — завидьтіс.

— Сöмын эн пондöй кинад, льякөсьтад, — öлöдіс другъяссö Филипп.

Детинаяс панласигтырйи котöртисны ю дорö. Гажаа дзольгис-визувтіс векныдик ю. Баыс вöлі сöдз, шоныд. Детинаяс пöрччисны дөрöмъяснысö, пырисны ваö.

Посныдик черияс тэрыба чепöсйылісны детинаяс кок улысь, дзебсялісны изъяс сайö, колодаяс улö. Чери куталысьяс кань моз кыйöдчисны, польтікасисны ва пытшкын.

Регыд найö аддзисны пань кузя сьöд налимöс. Кутшöм окота лои сійöс кутны. Сöмын тай он босьт. Пöсъявтöдзис нин вöтлысисны куим друг визув чери бöрся, а кутны некыз оз вермыны. Коркö не коркö налимöс удайтчис жö йöршитны гöгрöс вутш улö.

— Öні он пышйы, — радліс Филипп да кияссö надзö-никöн вайис черилань.

Колялөн дрөгнитіс сьолёмыс. Сійё повзис, мый налимыс сюрё Филиппы, а оз сылы. Уськөдчис котөрөн вутш дінө. Кватитіс юрөдыс чериөс, көсйис нин шыбитны берөгө, но нильөг налим песовтчис, уси кисьыс.

— Кутөй! Пышъяс!— горзисны детинаяс и вөтчисны чери бөрся.

Лёша көсйис паныдавыны мудер налимөс, но крукасис кытчөкө, чорыда уси пидзөс вылас. Синъясыс пемдылісны. Доймөмысла горөдіс.

Филипп отсаліс чечыны другысла. Петкөдіс сійөс веж луг вылө. Лёшалөн пидзөссьыс визувтіс вир.

— Ой-ой-ой... Доймө!— синвасө нылаліс Лёша.

Вирыс кутіс визувтны ёнджыка. Филипп да Коля сулалісны юрнысө өшөдөмөн, быттьө найө вөліны мыжаөсь Лёша доймөмысь.

— Көртавыны колө,— гөгөр видзөдліс Филипп.

А мыйөн көртавыны, кор турунысь кындзи нинөм абу.

— Көрталөй,— кевмысис Лёша.

— Коля, тэнад дөрөмыд важ нин, вай сійөн көртам,— шысис Филипп.

Коляөс быттьө швачкөбтісны плетьөн. Сійө кыкнан кинас кватитіс дөрөмсө, топөдіс морөс бердас.

— Он сет?— выльысь юаліс Филипп.

— Мудер тай... Аслад дөрөмөн көртав.

Лёша пыр на бөрдіс да полігтырйи видзөдіс вирөсь кокыс вылө. Филипп ветлөдліс өтарө-мөдарө, думайтіс ыджыд дум. Сэсся курччис пар дорсө, лэптис пу бокысь дөрөмсө и дыр видзөдіс.

Жаль вөлі косявыны выль ситеч дөрөм. Поліс мамысыс; видчыны сійө кутас, колөкө, тасмаөн нөйтас. Но аслас медбур другыс вөлі ещө на жальджык.

— Мамө-өс корөй!— ёнджыка бөрддзис Лёша.

Коля көсйис нин котөртны Лёша мам дінө, но кыліс: бөрвылас мыйкө чажмуні. Бергөдчис и синъясысла оз верит. Филипп пиньяссө гурчкөмөн косяліс дөрөмсө и заводитіс көртавыны Лёшалысь пидзөссө.



А сьѧ шонді дона гөсть моз пырис керкаө. Видзөдліс гөгөр, сьѧкнитіс асьѧс югөръяссө быдлаө, кытчө судзис кыс. Аддзис крөватьяс вылысь челядьөс, кодъяс пыр на узисны, надзөникөн мөдіс гильөдны найөс.

«Но и узьөм тѧн. Бур йөзыс удж вылө нин муналісны, а ті пыр на жуйвидзад. Чеччөй, пальөдчөй, шөвк юранывкаяс, гожьялөм ки-кока детинкаяс»,— чуксасис шонді.

Он көсйы, да лоө энөвтны небыд вольпасьтө. Гожея шондйыд тай оз радейт дышөдчысьѧстө, дыр узьысьѧстө.

Медся первойөн звиркнитіс крөвать вылысь еджыд юрсиа Валя, коді чой-вок пиас вөлі медся ичөт. Сійө пыр жө мөдіс чуксавны чойсө:

— Зоя, Зой! Ме ола нин... Чур... медся водз чеччи,— и заводитіс бергавны дурпоп моз места вылас. Ачыс тяпкөдө вомсө, быттө юмов кампет вомас вөлі.

Сөрни шыө садьмис и Митя. Нюжмасьыштіс, мисьтөма видзөдліс Валя вылө, сэсьѧ някыртіс сійөс пыш кодь еджыд юрсиөдыс.

— Он кут мөдысь чуксасьны.

— Ой, доймө! Таысь ме тэнө водзөстө ваөн пызьѧ.— Валя босьтіс нин киас ва тыра көш, но вокыс удитіс сылы лыйны юрлөсөн.

Ичөт чойлөн көтасис морөсыс, вомыс лои рушмөм кушман кодь. Бөррдзис да котөртіс норасыны пөчыслы.

Виктор, коді чойяс да вокьяс пиас вөлі арлыднас и тушанас медся ыджыд, чеччис медся бөрын, гурйив осьтіс өшиньяссө да долыда читкыртіс синъяссө.

— Ок, и купайтчыштам талун,— сэсьѧ видзөдліс гөгөр да гораа шыасис:— Ноко, коді менсьым дөрөмсө дзебид? Бокныд али мый луддзис? Кылад!

— Ме тай эг босытлы-а,— тэрыба шыасис Зоя.

— Колөкө, пон пышйөдiс,— нюмъялис Митя.

Валя пырис кухнясы, нерыштіс кузь Викторөс.

— Синтөм кутю, дөрөмыд тай джоджас туплясьö. Не-кор сэсса кампеттö ог сет, платтьöөс ванас ставсö көтөдiн. И мамöлы на ещö удта.

— Ичөтъястö верман,— дорйыштіс чойсö Зоя.

— Шыть!— понъясөс моз чирыштіс Виктор, и чой-ясыс здукөн ланьтісны. Он кө кут сылысь кывзыны — пыр и нырад печиктас. А печикыс Викторлөн чорыд, му-код дырйи доймöмысла синваыд чепөсьяс.

Крөватьяссö лөсьöдыштөм бöрын челядь пуксялісны пызан сайö, кытчö мамыс удж вылас мунтөдз кольöма быд чөскыдторсö. Викторлөн кыис медся кузь, зэв ыджыд яй тор босытіс, тэрыба гулькнитіс кружка тыр йөв. И шаньгаыс сылы медся уна сюри. Чойясыслы курас-ка-расыс сөмын кольыштіс. Митя эськө мөдліс жö шуасыны, но Виктор кисель сёян паньнас плешас сылы печать пуктіс.

— Нина Ивановна талун ставнымöс корис локны школаö, кутам совхоз муяс вылысь ёг турун весавны,— тасыті-паньсö мыскалөм бöрын юөртіс Зоя.

— Тэтөг төдам,— вомгорулас нурбыльтіс Виктор да заводитіс бара видзөдны öшиньö.

— Төдан кө, и мөдөдчам. Ми Викторкөд капуста му вылө мунам, Митя кутас школаын кроликъясөс вердны. Но, а тэ, Валюш, кольччан гортö. Тэнö некытчö эз кор-ны,— сеталис индөдъяс Зоя.

— Ок, и уджалыштам талун!— вочавидзис Виктор.

— Мудер тай... Асьныд мунад, а мем ковмас гортын черъявны. Ог көсйы. Школаö муна, ассым дзоридзьясөс кута дөзьөритны, кодъясөс тулыснас садитлі,— эз сетчы Валя.

— Мед мунас. Некод сійөс оз кут,— стрöга шуис Вик-тор.— Вот йөйыд, ме кө эськө радлі тэ местаын.

Нельнанныс мөдөдчисны школаö. Зоя да Валя кутчы-

сѣомаѡсь ки на ки. На бѡрся вѡтчис Митя. Медся бѡрын дыша вунгыртис Виктор. Сылы абу окота татшѡм шоньид да мича луннас ноксыны капуста му вылын. Но нинѡм он вѡч, учительница корѡма да быть уджав.

Мунѡны чойяс да вокъяс. Ставныс радѡсь, сѡмын Виктор жугыльмѡма. Кодкѡ быттьѡ сійѡс кыскѡ сира гез-йѡн. Воськовтас гоз-мѡдысь, кыйкнитлас юлань. Табанитчѡ дыш вѡв моз.

Виччысьтѡг Виктор кыліс Влас другыслысь чукѡс-тѡмсѡ:

— Ми тай купайтчыны мѡдѡдчим-а... он ѡмѡй миян-код мун? Ачюд ещѡ кѡсйисин.

Детина, кодлы вѡлі мѡдѡдѡма тайѡ кывъяссѡ, пыр и бергѡдіс юрсѡ гѡлѡс шыѡ. Аддзис Власѡс, кодѡс ѣртъясыс гѡрд юрси вѡснаыс нимтісны рыжик-пыжикѡн.

Виктор кыйкнитліс чойяс вылас, кодъяс восьлалісны нин вель ылын, нерыштис Митяѡс, сѣсся шыбитчис бадь кустьяс сайѡ, туйсыс бокѡджык. Дзик пыр и вуні капуста муыд.

Кор чойясыс казялісны Викторлысь пышйѡмсѡ, дыр чуксалісны да видісны сійѡс. Мый вѡчан, ковмис ас кезаныс мунны школаѡ.

Рытнас, кор шондіыс лѣчис шойччыны да ывлаын эз нин вѡв асыв мозыс югыд да гажа, Викторлѡн чойясыс да Митя вокыс воисны гортас. Локтісны удж вылысь и бать-мамныс.

— Челядь котыр, кутшѡма сѣсся отсасинныд талун совхозлы, школаыдлы? Ошйысьѡй, коді мый вѡчид,— шыасис батыс.

Висьталісны ставѡн: коді мый вѡчис, кѡні коді уджаліс. Батыс кывзѡ да ошкѡ челядьѡс.

— Тѣ нѡ мый чѡв олан, пиньыд али мый висьѡ?— юаліс Викторлысь мамыс.

Виктор вомас быттьѡ ва босьтѡма. Да и мый висьталас, кор Власкод лунтыр тупляисны лыа вылын да яй лѡзѡдтѡдзыс купайтчисны.

— Ме ассым дзоридзьясöс мудйи. Учительница весиг ошкис,— öни нин мамыслы ошйысис шабди юра Валя.

— А ми совхозын пöдругаяскöд капуста му весалим,— содтыштис Зоя.

— Ой, кроликъясным кутшöм мичаöсь. Öти кролик менсым весиг певйöс курччис. Ньöти эз и доймы. Ог пöръяв. Ме и аски найöс вердны ветла. Медся чöскыд турунсö вая,— кылис Митялөн гөлöс.

Батыс вылысь видзöдлис ыджыд пи вылас. Виктор синьяссö лэдзис увлань.

— Талун, сідзкö, бара дышгурдейөн ворсин! Учительницаыд тай паныдасис да норасис, став велöдчысьяс пö уджалöны, а тэнад пиыд нырсö школаö оз мыччыв.

— Абу тай яндзим, потш кузя быдмин, а дыштö ас дінсыд вöтлыны он вермы,— көритис сійöс мамыс.

— А менö Викторыд асывнас юрсйöд нетшыштис,— норасис Валя.

Пуксялисны пажнайтны. Виктор босьтис паньсö первойөн, медся кыз нянь шöрöмсö бара жö кыскис асланьыс.

— Ме кө тэ местаын вöли, яндыси эськö пажнайтнысö пуксыны,— крапнитис-шуис батыс.

## «ОГ КÖСИЫ»



**К**ор да кытысь кывлис тайöс Проня первоыйсь, öни и ачыс оз тöд. Но тайö мустöм кывьясыс во-мöд нин көвьясисны сы динö. Оз вермы детина мынтöдчыны да вунöдны найöс. Мукöд дырйи оз нин көсийи шуны, но ачыс оз тöдлы, кызди чепöсьясны. Жбыркнитасны-лэбзясны, унаöс чуймодасны. А Пронялы таысь бара лöпель йылöдзыс гөрдöдлыны.

Дзик эськө и прөстөй да и абу видчан кывъяс, а дöz-модасны Проняос. Эз нин этшаысь ертъясыс видлыны да дивитлыны детинкаос. Некор нин сэсся модысь оз кöсйы казътивны тайö кывъяссö, да оз и тöдлы; бара чепöсьясны вом пытшкөссыйс, вöтöд кöть сэсся найос да бөр тойлав, кытысь петисны. Но кутан öмöй шуом кывтö? Петас вомсыд, вöчас серам либö теш, а ачыс пыр и вошö кытчökö сынöдас.

Со и талун, кор Проняос мамыс кутис ыстыны юкмöсысь вайны ва, детиналөн тöдлытөг бара артмис:

— Ог кöсйы!

— Нолтö, мый шуин! И кор тэ вунöдан тадзи шуасьнытö? Öнi жö петав, мися, вала.

— Но петала, петала,— неокотапырысь вочавидзис Проня.— Ме öд эг кöсйы тадзи шуны да тöдлытөг артмис,— дорйысис детина, а сэсся кинас вель ёна кучкис аслыс вомас, быттö сийö вöли мыжа «ог кöсйы» шуöмысь.

Тайö луннас Пронякөд лои ещö на мод татшöм дивö. Мунис сийö школаö, пырис аслас классö, а сыкөд öти парта сайын пукалысь Соня юөртис нин:

— Ольга Афанасьевна висьмöма. Колökö, оз и кутны миянös талун велöдны?

— Ме эськө коляоз сёйны вөрö кайла,— кутис радлыны Проня.— Ме тöда öти пу, кöни медся уна коляозыс. Сэтшöм чöскыд да гырысь, пөттöдзыд позьö сёйны.

Но ставыс артмис модарö. Мыйөн кылис школьнöй звёноклөн шыыс, классö пырис учительница Ольга Афанасьевна. Здравыйтчис челядькөд, сэсся видзöдлис дöска вылö да пуксис аслас местаö.

— Сидзкö, пöръялисны менö. Оз и вөлöм вись,— шöпнитис Пронялы Соня да ассьыс еджыд кияссö пунктис парта вылас, быттö ошйысьны кöсйис наөн.

Проня люкасыйсь кöза моз зумыштчöма. Пыр на мөвпалö пушкыра коз йылысь, кöни öшалö помтöм-лыдтöм коляоз.

«Бара, сидзкö, велöдчыны ковмас»,— скöралö детина

да кыйкнитлывлө ыджыд өшинь пыр ывлаө, көні сэтшөм гажа да лөсьыд.

— Коді энö вöчöй урокъястö, лэптöй китö,— корис учительница.

Проня видзöдліс водзас и бöрас. Ки лэптысьяс некод эз вöвны. Ачыс көть сійö арифметика кузя гортса заданиесö эз вöч, но пукаліс чöв. Надейтчис, мый Ольга Афанасьевна талун сійöс оз мöд юасыны. Медым учительница эз казав сійöс, востіс книга да синъяснас сатшкысис сэтчö.

— Проня, дöска дорö,— надзöникөн шуис учительница.

Пронялы юр вылас быттьö көдзыд ва тыра пельса путкыльтісны. Шöйöвоши, оз тöд, мый вöчны.

— Он öмöй кыв? Дöска дорö корöны,— вашнитіс пеляс Соня.

— Ог көйы!— гораа артмис Пронялөн, а ачыс чеччис да кыкнан кинас кутчысис партаас. Сылысь кывъясö учительница пыр и кыліс, а челядь ставөн серöктісны.

— Сідзкö, бара уроктö эн вöч,— юрнас öтарö-мöдарö докнитіс Ольга Афанасьевна.— Двойка ковмас пуктыны. Пуксьы!

Бара жö кык мустöм кывйыс сконъялісны Проняös. Эз кө шу «ог көйы» да петіс дöска дорö, колöкö, и вермис решитны задачасö.

Нельнан урок чöжыс Проня эз лысьт видзöдлыны ни учительница, ни ёртъяс вылас. Переменяяс дырйиыс весиг классыс эз петав.

«Мамö кө тöдмалас двойка йывсьыд, дерт, велосипедтö оз ньöб и телевизор дорын оз кут лэдзны пукавны»,— майшасис детина.

Кузьөн кажитчис тайö луныс Пронялы. Көркö тай сэсся помасисны жö урокъясыс. Восьлалö сійö гортас да скöралö ас вылас. «Аскисянь сэсся некод оз кыв мясянь тайö кывсö. Быдөнлы кута шуны «кöсья».

Локтіс гортас, эз на удит пөрччысьны, а мамыс кес-йёдлө нин:

— Пронюк, гашкө, ветлан бабыд дорө, юалан, ваймис эз на пывсяныс?

Пронялы көть зэв дыш вөлі котөртлыны сикт помөдз, но дум вылас уси школаас тешкодя артмөмыс да гораа вочавидзис:

— Көсья! Дзик пыр ветла.

Мамыс весиг чуймис. Быд пөрийө, кор тшөктан вөлі Пронялы мыйкө вөчны, пыр и вочавидзас: «Ог көйы!», а өні сы пыдди шуис «Көсья!».

Но тайө бур кывсө век жө Проня вунөдіс. И зэв ре-гыдөн вунөдіс. Кызкө өтчюд Ольга Афанасьевна шыасис велөдчысьяс дінө:

— Челядь, аски ми быдса лун кежлө мунам Тыла шор дорө. Видзөдлам, кызди ловзёны сәні пуяс, мый вежсис төв бөрын. Быдөн сьөрсьыныд босьтөй сёян-юантор.

Челядь радысла мөдісны клопайтны кияснас. Быдөнлы вөлі окота ветлыны Тыла шор дорө, видзөдлыны, кызди вежсьөны да пасьтасьөны тувсов паськөмөн пуяс, пукыштны кыр дорын да кывзыны тувсов шорыслысь вом тырнас бузгөмсө, нимкодясьны лэчюд гөлөса лэбачьясөн, кодьяс воисны войвылө шонид муясысь, паськыд саридзьяс дорысь.

Аскинас ставөн мөдөдчисны Тыла шор дорө. Быдөн сьөрсьыныс босьтөмаось вөлөга; коді кын картопель, коді пирөг-көвдумьяс. Проня өтнасөн немтор абу босьтөма. Детинаяс и ведраястө сьөрсьыныс нуоны. Позьө чай юны и картопель пуны. А бипур вылад пуём вөлөгаыд өд лөка чөскыд.

Уналаө волісны, унатор видзөдлісны велөдчысьяс тайө кузь тувсов луннас. Сэсса өзтісны бипур и заводітисны пусыны. Луныс мича, шондіяс яр да мелі, сингьястө весиг ёрө. И сөстөм сынөд вылад быдөнлы велөдчысьяс пиысь окота сёйыштны.

Пуисны картофель, кодлөн мый вöлі, пузьöдісны ведра тыр чай. Сэсса кодзувкотъяс моз ставөн пуксялісны картофель ведра гөгөр. Заводитчис сэтшөм пир, дивуйтчыны верман. Сувйöны сöмын картофельтö öта-мөд вежмөн.

— Тэ нö мый, Проня, бокин пукалан? Эз öмöй сюмав кынöмыд?— юалис Ольга Афанасьевна детинкалысь.— Пуксы да сёй, а то гортад он во.

— Ог көсйы!— бара артмис Пронялөн, көть и аслас муртса нин дуль ваис эз пет.

— Ой, кутшөм чöскыд! Кывтö нбылыштан,— содтіс Соня.

— Ог көсйы!— мөдысь шуис Проня да биур дорысь вешйис ещö на ылöджык.

Картофель тыра ведра регыд и тыртöммис. Заводитісны юны чай. Соня кутіс кевмысьны Пронялы.

— Лок көть чайсö ю, мый нö дузьялан?

— Ог көсйы!— кывсö мыччыліс Проня.

Рытьявылыс нин челядь мөдöдчисны сиктö. Быдөн радöсь, дурöны, сывны горöдласны. Проня восьлалö медся бöрас да видö асьсö: «И мыйла ме эг пуксы сёйны? Кынöмöс дзикöдз нюкыртіс. Колі жö шуны «ог көсйы» да «ог көсйы». Вунöдлі öд нин да бара на кытыськö петіс».

Сöмын тайö лоөмтор бöрас Проня вунöдіс тайö ковтöм кывъяссö. Кодкö кө öні сылы шуас: «Проня, аски мунам совхоз муяс вылö уджавны», сійö пыр и вочавидзас:

— Көсья!

— Проня, чипанъястö вердышт,— шыасяс мамыс.

— Көсья!

— Проня, Дарья тьötкалы отсалышт пес пилитны.

— Көсья!

Проня «ог көсйы» кывъяссьыс öні сэтшөм жö ёна полö, кыдзи ичöt дырйиыс повліс көйнысь да ошкысь, көть и тайö зверьяссö ачыс öнөдз на эз аддзыв.



Вася Васин ёна радейтö больгыны. Тöдтöм морттö сідз бөбйөдлас, дыр кутасны дивуйтчыны. Лыддяс кутшөмкө книга, да пыр и юрас чужасны гырысь думъяс. Любитö сійö баквалитчыны да ошйысьны и другъяс водзас. Висьталас мыйкө да быттö сідзи и колö.

Кыдзкө öтчыд Васин лыддис «Пионерская правда» газетысь интереснöй гижөд. Сибирса öти школаысь велөдчысьяс гижöны сәни, кызди найö вöчисны асланыс вынъясөн планер. Вөлöма ордйысьөмгъяс, да челядь киясөн вöчөм ичөтик планер лэбалöма медся дыр. Газетын весиг рисуйтöмаөсь да стöча висьталöмаөсь, кызди позьö вöчны татшөм планерсö быд школаын.

Вася Васинлы тшöтш окота лои видлыны асьыс вынъяссö. Суйис газетсö зептас да мөдөдчис корсьны другъяссö, кодъяс урокъяс помасьөм бöрын пырджык чукөртчывлісны ворсны сикт помö, паськыд луд вылö. Регыд и адзис зонпосниясöс.

— Аскисянь ме планер кута вöчны. Со татшөмөс, кутшөмөс рисуйтöмаөсь газетас,— ошйысис Васин.

— Тэ тай куим лун сайын на көсйысьлін бумагаысь ыджыд змей вöчны. Лун и вой пö кутас лэбавны школа весьтын. Артельөн кө вöчим змейсö, важөн артмис,— элясисны детинкаяс Вася вылö.— Көні нö эськө змейыд?

— Вöча! Вöча! Чайтад, оз артмы? Аддзад да завидьтыны кутад. Шуркнита-лэдза змейтö медся кузь шöрт йылысь.

Вася Васин вылысь паськөдіс газетсö да кутіс гөлчитны.

— А планертö наысь на лөсьыдджыка вöча. Вот аддзанныд. Волöй аски рытъявылыс, дась нин лоас.

— Вөчан! Вөчан!— горөдіс медся ыджыд тушаа Толя.

Челядь ставөн серөктісны. Васин весиг дузъявны ку-тіс, бөр идраліс газетсө зептас.

— Васька, гашкө, өтвылысь планертө вөчамөй? Чу-көртчамөй аски тіян дорө водзджык и быдөн кутам от-сасьны,— шыасис сыкөд өти классын велөдчысь Коля.

— Но да... Ёна тай колад, ме и ачым мастер, мешайт-чыны сөмын кутад,— пинь пырыс сөдзөдіс вылын юра тшап Васин.

— Вөчас! Вөчас!— кыліс Толялөн гөлөс.— Васькаыд өд быдтор кужө, сылөн быдтор артмө.

Другъясыс Васинөс дзикөдз дөзмөдісны, ку пиас эз кут төрны. Сэссия скөра өвтыштіс кинас да мөдөдчис гортас.

— Он кө эскөй — и веськодь.

— А ми аски футболөн ворсанін кутам лөсьөдны. Гашкө, тшөтш волан уджавны, Васька?— горөдіс сылы детинкаяс пиысь өти.

Васинлы быттьө вомас юмов кампет сүйисны, пыр и бергөдчис другъясылань, гөгрөс чужөмыс лои ещө на паськыдджык.

— Ой, кутшөма ме радейта ворсны футболнад. Вола, збыльысь вола. И зыр босьта.

— Сөмын эн пөръяв, а то ог кутөй сибөдны ворсныд.

— Потшөс-майөгсө верма оқыштны, он кө эскөй,— морөсас таркнитіс Васин да мунигмозыс нин горөдіс:— Вөчам стадионтө, вөчам!

Рытнас Васин дыр тотшкөдчис гортас. Ёгсө быдса чу-көр вөчис, аслыс киас весиг мөлөтөн сизьдыштіс, доймө-мысла муртса эз бөрддзы. Гашкө, дас пөрийө лыддис пла-нер вөчөм йылысь газетысь индөдъяссө. Пөсяліс, мудзис, а немтор эз артмы. Дөзмис Васин, шыбытіс вөчанторсө пачө, пуксис телевизор дорө да сідз пукаліс матө вой шөрөдз.

Войнас весиг вөтасис планер йывсьыс. Став велөд-

чысьясые быттё волісны видзёдлыны вёчөмторйис вылө. А кор Васин кыпөдіс планерсө муртса тыдавмөн вылөдз, быдөн кутісны клопайтны сылы да ошкыны: «Айда мян Вася! Васинлы ура-а-а! Өні мян эм асланым конструктор!»

Васин ун йывсьяс мыйкө горөдіс да пыр и садьмис. Планер пыдди дінас куйліс Мурка каньис да нюліс Васинлысь сувтса пельяссө. Шогөдіс Васинөс, водзвыв эз ков ошйысьны другъясыслы, планерыд өд эз артмы. Өні бара серавны сы вылын кутасны. Сідзи нин унаөн нимтөны сійөс. «Вөча, вөча!» ним сетісны.

«От кут шогсьыны, планерыд кө эз артмы, мыйкө вөча сэтшөмтор, мый челядълөн синъясыс паськаласны. Сөмын мый вөчны? Вот эськө төв кежлас кө дадь вылө сувтөдны парус! Пуксян мед даддяс, и ачыс сикт кузя төвзёдас-нуас школаөдз. Чуланын брезент тор туплясьө, сэтысь и позьө паруссө вөчны»,— аскөдыс варовитіс Васин.

Кор өшиньясын мыччысис нин югыд рөм, детина юр вылөдзыс кыскис эшкынсө да кунис синъяссө. «Бур, мый талун оз велөдны, узыны позьө мыйта колө».

Унаысь восьтыліс синъяссө Вася Васин. Нюжмасис, окота вөлі на куйлыштны, да кынөмыс кутіс няргыны, сөйны корны. Ковмис чеччыны. Мамыс абу гортас, төдөмысь, пөттөдзыс нин удитіс уджавны. Пызан вывсьяс аддзис мамыслөн киён гижөм бумага: «Васюк, ветлы магазинө да ньөб нянь. Горт гөгөр уджъяс вөч: ва да пес пырт. Воа сөрөн. Сөяныд гөбөчын».

Лыддис Вася гижөдсө да ачыс эз төдлы горөдіс, быттё мамыс ськөд вөлі орччөн:

— Вөча, вөча! Ставсө вөча, мый тшөктөмыд. И няньла ветла, и пес да ва пырта. Луныс өд кузь.

Пуксис телевизор дорө, мыссьыны да сөйны весиг вунөдіс. Синъяс доймытөдзыс куткырвидзис сәні. Сөйыштіс да бара видзөдіс кинокартина. Кор кутісны петкөдлыны

футболөн ворсөм, друг шай-паймунліс, синъяссө паськөдіс, өшинь дорас котөртіс.

«Ой, ме жө футболөн ворсанін вөчны көйи ветлыны! Вунөдчи тай дзикөдз. Өні нө кытчө нин мунны, пемдас регыд. Часлы, петала посводзө, брезент пырта и даддьө төв кежлас парус заводита вөчны. Гашкө, водз на вөчнысө, төлөдзыд өд ылын на».

Дзикөдз ылалі Васин телевизор дорад. Эз ветлы ни магазинө, ни пес да ва эз пырт. Пемдіс ывлаыс. Мамыс мед оз вид, висьөм улө лэччысис.

Аскинас муртса на пырис школа йөрө, другьясыс кутісны эльөдны Васинөс:

— «Вөча, вөча» локтө, медся пөрьясысысыс. Видзөдлөй сы вылө, бара кутас ылөдчыны да көйысыны.

Вася лэдзис юрсө увлань да муртса кывмөн нурбыльтіс:

— Эг эшты волыны отсасьнытө. Лунтыр даддьө парус вөчи. Төвнас тіянөс тшөтш кута ислөдлыны. Кыв сета.

— А кор нө планөртө эштөдан? Тэ өд төрыт нин көсйин вөчны,— юасис Толя.

— Вөча, вөча!— сөмын и артмис Васинлөн.

Татшөм сьөлөмсьыс челядь важөн нин эз серавлыны. Вася пырис школаас, а велөдчысыяслөн ызгөм-сералөмыс пыр на чуналіс пеляс.

...Унатор на мөвпыштліс вөчны Васин. Матыстчө нин төв, мусө еджыд лым вевттис, а пөрьясысыс Васьлөн планёрыс сідзи и эз кыпөдчыв сынөдас. Кык вежон чөж ноксис сійө и парус вөчөм вылын, бара немтор эз артмы. Эновтчис и сыысь. «Мый меным паруссыс, бурджык ветлыны школаө подөн».

Орчча керкаын олысь нывка неважөн Васинлы сетіс кычипи. Быдты пө понсө, колөкө, а то миян пө кык пон нин эм. Детина лоис сэтшөм рад, омөля и янсөдчылө ас-лас быдтаскөд. Став сикт пасьтаыс ошйысыны кутіс:

— Полканөс ме йөктыны и служитны велөда, водз

кокъяс вылас кутас ветлөддыны, быд дзебөмторсө корсьны.

— Гашкө, понйыд и книга тшөтш кутас лыддыны,— шмонитисны сиктса войтыр Васин вылын.— Но и Вася Васин! Уна жө тэ быдторсө көсйысьлан керны-вөчны, а помөдз өти удж он вайөд. Он кө тэ морттө ылөдды, войыд, көнкө, оз узьсы.

«Вөча, вөча» немтор эз вермы та ылө вочавидзны.

Быдмас сйө да вермас татшөмөн и кольны. А пөрьясьысьястө да лишной больгысь-ызгысьястө миян некөн оз радейтны.

## ГОЖСЯ ЛУНО



Федя да Лева лэччисны Часө чери кыйны. Сикт весьтас сәні запань, вөр пурьялөны. Запаньянь неуна улынджык бона тыдалө. Сәтчө и сувтисны другьяс. Локтөмөн тшөтш детинкаясө мыськыштіс шоныд зэр. Вуграсьясьяс эз мөдны весиг дзебсьыны-саймовтчыны зэрысь. Сәсся вылысь мыччысис шонді, важсьыс югыд да мелі. Здукөн и косьтіс детинкаяс вылысь көтасьлөм паськөмьяссө, чужөмьяс вывсьыс нюлыштіс өтка зэр войтьяссө.

Лева пуксис берегьянь неылө, лэдзис кык донка, сәсся мөдіс вуграсьяны. Рыт кежлас көть юква ылө песни чериясөс кыйны. Федя лөсьөдчис кыйсьыны визувджык местаын.

Берег дорын сялькөдчисны арпиян. Найө кыпөдчыласны дзык ва веркөсөдз, быттө көсйөны гождчыны шонді югөрьяс водзас. Лева шыбитас черияслы няньтор, и найө ставөн уськөдчыласны крөшкьяс ылө. Лөсьыд

видзодны, челядьяс моз ворсёны найо. Кольо во-мод, и ёспян быдмасны, лооны прамой чериясён.

— Фeдь, а Фeдь, воли видзодлы, тани менам быдса детсад,— нимкодясьо арпиянён Лева. Эз удит помавны висьталомсё, кызди посни черияс сямунисны, пышйисны, кодi кытчö путьмис.

«Сир, буракö, вöйсöдлö,— думыштiс Лева.— Вот эськö кыйны кö сийöс!» Сумкасьыс перйис жерлица да ичöтик якöрас пысалис визув йөршöс, кодi сöмын на шедi шатинö, сэсся лэдзис черисö ваö. Мед кыйсьö, колöкö, сирыд и босьтас, любитö öд сийö йөрштö, кöть и щötьясыс ёсьöсь.

Эз кутны шедны черияс, быттьö ваö лэдзöм йөрш юртiс налы, медым оз матыстчыны Лева вугыр дорö, а то юква наысь пуасны.

А Федялы шедö: то сынпи лэптас, то ляпа кутчыяс. Дöзмис Лева черияс вылö, шомкор сёйны берегö петiс.

Детина туплясьö веж луд вылын, шнячкö-сёйö шомкор гумъяс.

Кöнкö зэв матын сьылöны чиркъяс, берег пöлөн лэбалöны шöвк бордъяса бобувъяс. Лева видзодлас пробка вылас, бөр нюжодчас шоньд му вылö.

Шондiыс сiдзи и баййöдлö, синъястö куньны тшöктö, туруныс вольпась кодь небыд, юрлöс пыдди — эжа вутш. Унмовсис Лева, оз кыв весиг гутьяслысь курчасьöмсö.

Колöкö, вель дыр узис, но Федялөн гөлöсыс садь-мöдiс.

— Ле-ва-а-а! Чеччы, öшкыс люкалас!

Восьтiс Лева синъяссö, а сысянь неылын и збыльысь сьöd öш сулалö, буксö, водз кокъяснас резыштас мусö, синъясыс гырдемöмаöсь, скөрöсь. Öдйö жö котöртiс Лева бона вылö: сэтчö, дерт, повзöдчысь öшкыд оз пыр.

Лева видлалiс донкаяссö, кык йөрш шедöма. Сэсся матыстчис жерлица дорас, заводитiс лэптыны, но кодкö дзык пыр и зэлöдiс жилкасö. Ёкмунi сьөлöмыс чери кыйысьлөн. Лева горöдiс Федялы:

— Сакнад волы, кодкө шедома! Одийджык сомын, мынас!

Федяос модысь корны оз ков, кватитис виж воропа саксо, которон воис другыслы отсог выло. А чери оз косы локны, кыскө модаро, бона улас. Левалон сингьясас повзюм да шог.

«Мынас, мынас... Меным од некор на прамойджыка чери эз шедлы». Гартыштитс жилкасө ки гогорыс, надзони-көн кыскө асланьыс.

— Кор тракнитас, личод, мед оз ородчы,— велодо сийос Федя, а ачыс лосюдчома нин сакнас гумовтны черисо.

Бона бокин мыйкө бузнитис, сесся мыччысис пасыкыд плеш. Тайо тырмымон вөли тэрыб Федялы, медым сир веськалі сакө.

— Берегас петкод, пышгьяс! Ой, пышгьяс, пышгьяс, эн лэдз!

— Оні некытчө нин сылы пышйыны. Молодеч, Лёвка, бур чери кыйин.

Лева босьтитс друг кысыс саксо и которон берего, радысла жерлицасыс жилкасө весиг ородис. Федя петис жо бона вылысь. Черисо саксыс путкыльтисны эжа выло. Сир кучкасыө божнас, бор косийо лэччыны юо. Вомас тыдало пань кузя екыш, нылыштнысө абу вермома.

— Ме од йорш самавли вугырас, а тани екыш. Кыдзи но тайо лои?

— А вот сидз... Йоршто нылыштитс екыш да ачыс шедис, а екышсө нин кватитис сир.

— Сидзкө, кык чериос отпырийо ичотик йоршыд кыйис. Верми кө, премия эскө, сылы сеті,— радліс Лёва, а ачыс кысыс эз лэдз сирсө.

— Но и но, талун тэ панийин менө.

— Мича, первойысь на татшомыс шеді.

— Ещө он вөли косийы локны.

— Оні быдлун кута кыйсыны. Ой, вомсө кыдзи пасыкөдлө... А-а... шедін жо, кужи порьявны.

Федя важон нин пырис аслас кыйсян местао, а Лева пыр на пукалис сир дорын да любуйтчис аслас кыйомтор-йон. То киас босытлас сийос, то мерайтас весытьяснас, кузь-о сийо лоо.

Любобыс, радлуныс — кошон коть курав!

## АРСЯ ВОРЫН



Шойчан луно батыс Сергейос чуксалис водз.

— Чеччы, пиук, воро петалам вологатор корсыны.

Небыд вольпась вылын коть зэв на лоссыд куйлыштны, но Сергей пыр жо чеччис.

Кодлы но абу окота кайлыны парма-яго, чосмасыштны воом пувийон, кывзыштны ылөдз нюжөдчөм дзор пармалысь аслыснога пошкөм-варовитөмсө!

Сергей комтогыс петалис ывлао. Асылыс праздник кодь кыпыд. Пыдостом енежысь он аддзы ни оти кымор чир, кодко быттьо мыскөма небесасо ставнас. Доналом шар кодь шонди руныго аслас туйод, гажөдо водз чеччысысө.

Сейыштөм-юыштөм борын ая-пия босытисны корзинаяс, пестеро тэчисны сеянтор, батыс перйис шкап костсыс пицаль — модөдчисны туйо.

Муяс да сеньяс вуджөм борын ворыс пыр и мыччысис. Эжмыштөм векныдик туй полон тыдалисны гажа норысяс. Ягсө вевттьома аслас еджыд тошкөн яла чукор. Восьлалан татшөм местадыс — кок улад нитшкыс кышакылө. Пуяс вылысь дугдывтөг гылалөны косьмом корьяс. Дыр найо бергалөны сынодас, быттьо думайтоны, кытчөджык налы пуксыны. Консюро туйсө дзыкөдз нин

вевттьомаоь корьясыс, аслыспөлөс вольоc артмома на-  
ысь. Сюрас ыджыдджык пув роз — Сергей пыр и копырт-  
чылас сы дінө, вөнъыдик чуньяснас шарснитас вотөссө,  
шыбитас вомас.

Вуджисны өти шор, недыр мысти паныдасис сэтшөм  
жө векныдик мөд шор. Пелысьыс мыйта таво! Розьясыс  
пуыслысь вожьяссө весиг личкөмаоьсь. Вотчыны кө, өдйө  
эськө көрзинаыд тырас. Пелысь пуяс мукөдлаас сэтшөм  
мичаоьсь, кодкө быттьө найөс баситөма. Ылөдз татшөм  
пуясыс тыдалөны.

Восьлалө Сергей батыс бөрся да нимкодясьө вөр-ва-  
ыслөн мичлунөн. Кыр йылө кайыштөм бөрын веськалісны  
пувья местаө.

— Тані вотчышт, а ме кытшовта веськыдыв, оз-ө  
сьолаяс сәні жыкруйтны.

Сергейлы көть окота видзөдлыны, кызди батыс ас  
вөчөм чипсанөн кутас ас дінас корны вөрса пөткаясөс, но  
быть лои кольччыны.

Батыс пырыштіс бокөджык и мыйкө дыра мысти ку-  
тіс нин чукавны сьолаясөс: «Ти-ти-ти-у-у».

Сергей заводитіс вотчыны. Вөрыс тані шоч, местаыс  
кос да мича. Эз на удит тупкысьны көрзина пыдөсыс,  
кызди пөрөм пу бокысь звиркнитіс повзьөм көч и заводитіс  
тривксөдны-пышйыны. Ок, кутшөм тэрыбөсь сьлөн  
кокьясыс, медся өдйө котралысьясөс здукөн коляс. Көч  
дзикөдз воши зонка синьяс улысь, но Сергей век на сула-  
ліс да нюмьяліс. Ловья көчтө өд сійө дзик на первойысь  
адзыліс. «Другьяслы кө висьтала, колөкө, оз и веритны».

Сергей корсюрө чошнитлас пельсө, думнас виччысьө,  
вот-вот кылас шковгөм-луйөм шы. Батыс өд сьлөн лөка  
мастер вөравныд. Арся луньясад быд вөрө петалігөн сьола-  
ясөс либө тарьясөс гортас вайлывлө. Но луйөм шы сідзи  
и эз кыв. Недыр мысти сійө бөр нин локтіс пиыс дінө.

— Ой, батьө, кодөс ме адзылі. Сө збыль... Со эсійө  
пөрөм пу бокас көч, вөлөм, шойччө. Дзик дінысь чеччыш-  
тіс, повзьөдіс весиг.

— Көчильёйысь кө повзин, порсь сералас.

— Ме өд муртса повзышти. Сэтшөм виччысьтөг кыпөдчис. Эн аддзы сьолаястө?

— Кыпөді өти позтыр, пышйисны, мамыс нуөдіс кытчөкө, быттө му пырыс вошины. Тэ, пиук, зіля вотчан,— ошкыштіс Сергейос батыс.— Молодеч!

Өні Сергей быд пөрөм пу дорө матыстчыліс надзөникөн, думнас виччысис, мый бара сэтысь кыпөдчас тэрыбкөч. Но көчильёйос сідзи и мөд пөрийө эз удайтчы аддзывны. Төдны, эськө, көні найө куйлөны, кузь пельяс!

Зато рытъявылыс Сергей аддзыліс вөрса медъён зверос. Лои тайө тадзи. Гортас бөрсө лэччигөн Сергейлы батыс индіс ордым да Чов ю дорөдз тшөктіс мунны сәті. Ачыс мөдөдчис вөр пырыс.

— Юөдзыс тасянь зэв матын, сөмын некытчө ордымсьыс эн кеж. Пос дорас воан да бипур вөч, чай кутам юны,— велөдіс сійос батыс.— Ме кытшовта нөрыс пөлөныс, гашкө, ельдөгъяс сюрасны.

Сергей восьлалө ордым кузя, оз тэрмась, мудзөманин лунтыртө вотчигөн. Батыскөд янсалөм бөрын сө воськов удитіс муртса вөчны — мыччысис нейджыд куш места. Көнкө неылын вөрзисны бадь кустьяс, сэсся мыччысьліс кутшөмкө сьөд вуджөр. «Кодлөнкө понйыс ризьялө, колөкө, көчөс вөйсөдлө?» Эз на удит детинка пуктыны көрзинкасө муө, кыдзи сысянь зэв матіті котөртіс ош. Тшөгөма, ыджыд да пельк. Зверь весиг эз и видзөдлы пу бөкө йөжгыльтчөм детина вылө, кустьяс вомөн чеччаліс пышйис водзө.

Сергейлөн ыркмуңлі сьөлөмыс, мөдіс котөртны ордым кузя. Көсийө горөдны батысө, да гөлөсыс повзёмысла сибдөма. Сайкаліс сөмын сэк, кор мыччысисны юбокса видзьяс да зорөдъяс.

— Батьө, честной пионерской, ошкөс аддзылі!— ылісянь на уськөдчис детинка батыслы паныд, кор сійө мыччысис вөрысь.

— Верита, ниук, ме и ачым аддзылі кок туйсö, дзик на öни тапикасьöма туй кузяыс. Ёна, көнкö, повзин?

— Менö сійö эз и аддзыв. Пышйис, со мый ыджда,— кинас петкөдліс Сергей.— А кызди котöртис, кустьяс во мөн төвзис сöмын. Повзи жö эськö да...

Бипур дорын ая-пиа дыр шойччисны, юисны чай. Сергей оз-оз да кыйкнитливлас син бöжнас ордым вылö.

Арся вөр надзöникөн мойдис аслас мичлун да кыпыд-лун йылысь помасьлытöм мойд.

## ГÖРД ГАЛСТУК



Ывлаын югыд да гажа. Тувсов шондi кыпöд-чöма енэж шöрас. Видзöдлан сы вылö — синьястö ёрö. Кузь төв чöж усьöм лымйыс весиг кажитчö мөд пöлөс, кодкö быттö сi-йöс едждöдöма. Лым вылас дзирдалöны югыдысь-югыд бисерьяс. Пуяс ас вывсьыныс шыбитисны лымторьяс. Водз асывсянь татшöм пуяс вылас гажöдчöны лэбачьяс. Тыдалö, и найö радлöны тулыс воöмыслы. Керка вевтяс вылысь эз на исковт лымйыс, но шондiа луньясö тэпкö нин сэтысь му вылö войтва, а войнас öшöдчöны кузь йи нёньяс.

Кольö неуна кад, и яр шондi сывдас став лымсö. Зiля кутасны сывны-гажöдчыны шорьяс, вöччасны мича паськөмөн керка бердын сулалысь пуяс.

Веня Костылёв радейтö татшöм луньяссö. Школаысь петöм бöрын тэрмасьтöг восьлалö гортас, пöттöдзыс лолалас чöскыд сöстöм сынöднас, сулалыштас пуяс дорын, көни шонтысьöны пышкайяс, унаысь видзöдлас лöз енэж вылö, кодi төвся кодзыд луньяс бöрын кажитчö торья мичаён.

Но талун Веняёс эз манитны ывлавывса серпасъясис. Тэрмасис гортас, медым ветлыны сэсса орчча сиктö, кöни учительница висъталöм серти олö Пильö пöль. Сійö сэтчöс сиктса первой пионер. А школаса следопытъяс буретш ги-жалісны медводдза пионеръяс йылысь казътылöмъяс ас-ланыс школьнöй музейö.

Муртса Веня пырис гортас, мамыс кутіс ваявны пы-зан вылö пиыслы сэян.

— Ог эшты. Пильö пöль ордö школасянь тшöктісны ветлыны,— юөртіс мамыслы Веня, сэсса босьтіс тарелка вылысь выя шаньга да здукöн и гульымтіс.

— Пильö пöльыд öд вежон нин больничаян, карын, висьмöма коньöрушка.

Веня эз виччысь татшöм юөрсö. Шогöдіс морттö бы-дөн. И висъталіс мамыслы, мыйла сылы ковмис тайö пö-рысь мортыс.

— Кытысь нö сэсса ме корся первойя пионеръяссö? Миян сиктын, колöкö, некод и абу сэтшöмъясис?— гөруй-тіс детина.

— Сөй да петав Яким дядь ордад. Сійö öд нэмсö тани олö. Колöкö, кодöскö и индас.

Венялы эськö эз вöв окота сёрнитны Яким дядькөд: оз радейт сійö варовитныд. Öдвакö вермас висътавны мыйкö пионеръяс йылысь, но век жö кывзысис мамыс-лысь да мөдöдчис сикт помланьын сулалысь важиник керкаö.

Яким дядь буретш вöлі гортас. Кöзалөн кодь ичöтик тошка, дзормöм юра олöма морт читкыртліс синъяссö да сюся видзöдліс Веня вылö, быттö кöсйис тöдмавны, мый могөн локтіс сійö сы дорö.

— О, кытыськö нэм виччысьтöм морт усьöма. Öти сиктын олам, а дзик первойысь воськовтін менсьым порогöс. Кутшöм нин мог суис, Степанович? Шонтысьны ог тшöкты: ныв ордö ветлі гөститны да керкаöй мөдöд лун ломтытöм. Да ті пуксьöй, ошйысьöй.

Веня пуксис лабич помö. Синъяснас кытшовтіс ыджыд комната гөгөр. И друг дрөгнитіс сьөлöмыс, кор дум вылас уси öтитор. Кык во сайын Веня аслас другкөд Яким дядь йöрысь гусялісны некымын галанка. Казяліс пакöститчысьясöс көзяин да уськөдчис на вылö беддьөн. Ачыс горзö: «Кутöй вөръяссö! Кутöй!»

«Тöдіс кө сэки миянös, шошаөд öні кватитас да горт-сьыс вөтлас. И мыйла ме, йöйыд, локті сы ордö?»— майшасис детина.

— Мый нö юртö öшөдін? Гашкө, школасьыд лөк бöжа двойка гортад вайин? Абу тай нö варов.

Яким дядь пуксис Венялы паныдөн, гыррдзанас мыджсис пызан пөвйö, быттö поліс усьöмысь.

— Тадзи и кутам пукавны да чöv овны? Гашкө, сёрнитантортö гортад колин? Ме тай öткөн олигад мукөд дырйи кузь лунтыр некодкөд ог варовитлы. Кань эм да оз куж сёрнитныс-а... Ныв эськө корö овны карö, да жаль көдзөдчыны чужан сиктыдкөд, ас йöз дорысь мунны. Эн пöрысьмы, Степанович.

Веня та бöрын неуна збоймыштіс, висьталіс Яким дядьлы аслас мог йылысь.

— Гашкө, тэ тöдан кодöскö первой пионерьяс лыдсьыс? Ме быдлаысь юасьлі, да некод оз тöд.

Яким дядь лэптыштіс вывлань юрсö, шылькнитіс ко-сіник кинас тош кузяыс. Уна чуқырьясөн зэвтöм чужöм вылас мыччысис нюм.

— Первойя пионерьясöс, сідзкө, корсяд, история көсьяд лөсьöдны, медым мукөдьяс на йылысь казътылісны? Тайö бур. Тöда ме сэтшöм йöзсö. Öльö грездын олö Пильö пöль. Менам томдырся друг...

— Ме сы дорö и көсьи ветлыны да больничаö водтö-дöмаöсь. Мед эськө көть бöрынджык висьмис. А то музейö колö вöлі сы йылысь гижны.

— Э-э... Висьöмыд тай оз юась,— вочавидзис Яким дядь, сэссия мыйлакө дыр чöv оліс, гашкө, мыйкө көсьис



уस्कӧдны дум вылас.— Первойя пионеръясӧс, сідзкӧ, тӧд-маланныд? Но и кодӧскӧ аддзид энӧ?

— Эгӧ,— шога юртис Веня.— Гашкӧ, сэтшӧмъясыс матігӧгӧрын и абуӧсь.

— Омӧля корсянныд. Он тӧдӧй асланыд сиктса йӧз-тӧ,— дивитыштис детинаӧс олӧма морт, сӧсса восьтис важ-ник камод, коді гӧгӧр нин вушйӧма, дыр лукйысис-кор-сис мыйкӧ и перйис сӧтысь гӧрд галстук, коді быгалӧма и едждыштӧма кытсюрӧ, пунктис Витя ныр улӧ.— Мый тайӧ?

— Пионерскӧй галстук, буракӧ. Гашкӧ, чышъян?

— Тӧдін. Тайӧ коркӧ мамӧлӧн чышъян вӧвлі. Кор примитисны миянӧс пионерӧ, сӧки меным дас арӧс на вӧлі. Буретш сійӧ вонас Ленин вождь кувсис. Но вот... прими-тисны пионерӧ, а гӧрд галстукыс сӧмын куимлы тырмис. Мукӧдъяслы пӧ мӧдысь сетам. Ме локті гортӧ да сыркъя-лӧмӧн бӧрддзи. Висьталі мамлы, мися, Пилькалы галстук сетисны, а меным эз тырмы.

Веня выльысь видзӧдліс Яким дядь вылӧ, оз-ӧ сійӧ шмонит, но стариклӧн синъясыс вӧліны эсканаӧсь. Гоз-мӧдысь сійӧ сьӧкыда кызӧктис и мӧдіс висьтавны водзӧ.

— Мамӧлы, тыдалӧ, жаль лои бӧрдысь пиыс. Перйис сундуксыс еджыд чышъян, краситис сійӧс гӧрд краскаӧн. Вот и артмис галстук. Мӧд луннас, кӧть поводдяыс вӧлі кӧдзыд, ме дӧрӧм кежысь мӧдӧдчи школаӧ. Аслым любӧ-ыс! Кӧсйи, медым ставӧн аддзылісны менсым гӧрд гал-стукӧс. А тэ, Вениаминушко, шогӧ усьӧмыд, абу пӧ миян медводдза пионеръяс. Тэнад дедыд миянкӧд жӧ пионерав-ліс. А тайӧ галстуксӧ сета тэныд. Видзӧй асланыд музе-йын. Ме со матӧ ветымын во сійӧс дӧзьӧриті.

Ӧні Веня радысла дась вӧлі топыда-топыда кутышт-лыны тайӧ косіник стариксӧ да висьтавны сылы ыджыд аттӧ. Но тайӧс вӧчӧм пыдди детина сӧмын шуыштис:

— Ми тіянӧс, Яким Алексеевич, пионерскӧй сбор вы-лӧ корлам. Воланныд ӧд? Честнӧй пионерскӧй... Со ті ку-

тшөм вөлөмыдось. А ме эг и төдлы. Ме кө тэ местаын, быдөнлы ошйыси эськө.

— Мый, мый, а ошйысыны эг велавлы,— нюмъевтис старик да тапнитис Веняос.

Детина босьтис кадөн вушйыштөм гөрд галстук да котөрөн мөдөдчис гортас. Сийө вөлі шуда и рад.

Детина мунөм бөрын Яким дядь дыр на пукалис да казытылис ассыс олөм-вылөмсө. Дум вылас усьлі, кызди гражданскөй война воясө сылөн батыс дорйис аслас өртъяскөд том Сөветскөй республика, кызди котыртисны сиктын первой колхоз. Кутшөм радпырысь татчөс олысь-яс виччысисны первой трактор, кызди кылис Москвасянь радиолөн гөлөс, сэсся öзйис электричество. Ставсө тайөс адзылисны сиктса медводдза пионерьяс. Асьныс, став йөзкөд өтвылысь, тэчисны выль олөм. Унаысь эз узылыны пөттөдзыс, унаысь пыклисны тшыглун.

## «ПЕГАШ»



**М**арина радейтө ассыс быдтассө — рудов гөна, кузь пельяса кроликөс. Чеччас вольпась вывсьыс, мыссяс, пасьтасяс и пыр жө мыйкө петкөдас Пегаш нима кроликыс-лы — то морков, то кын капуста листьяс.

Кролик бура төдө ассыс ичөтик көзьяйкасө, котөрөн локтас Мариналы паныд, водз кокъяссө лэптас нывкалы пидзөс вылас.

Васөд синьясыс кроликлөн меліөсь-меліөсь, быттө көсийоны висьтавны сөян вайысьлы ыджыд аттө. Пегаш оз дзик пыр уськөдчы сөян тасьтілань. Ичөт гөрд кывнас заводитас нювны Мариналысь кияссө, көдзыд нырнас тувкөдыштас кокъясас.

Нывка топодас кроликос морос бердас, дыр малалас небыдик гонодыс, гыжйыштас пель костьяссө, весалас гыж костьясас чукормом няйтсө. Пегаш жуйвидзө. Лөсьыд, тыдалө, кор сыкод мелялө козяйкаыс. Сэсся быттьо дум вылас усьо сёяныс, чеччыштас нывка водзысь, зяля модас калскыны-сёйны тасьтёо пунктөм вөлөгасө.

А төлысь нель сайын кролик вөлі сэтшөм ичөтик да омөлик, пуксьодан кө кыкнан ки пыдос вылад — төрас. Адзис да мездис ассьыс быдтассө Марина кань вомысь. Локтө вөлі кино вылысь гортас, и друг потшөс бокысь чеччыштіс төдтөм кань. Вомас кватитөма кролик пиос, сійө чужьясис кокъяснас да нораа горзис. Марина босьтіс моски бокысь бедь, уськодчис кань бөрся. Мөдыс, буракө, эз виччысь татшөмторсө, лэдзис вомсьыс кролик пиос, а ачыс гырыся чеччалігтыр усйысис-пышйис керкаяс сайө. Марина босьтіс мезданторсө. Кролик пи вөлі ловья на. Кымынкө лун видзис паччөрас, вердіс кагаос моз шоньд йөлөн нёнъ помысь. Кролик пи кутіс сөвмыны. Гожөмнас Марина ассьыс быдтассө лэдзлывліс котравны өшинь улас, быдлун вайліс Пегашлы свежөй турун, пу корьяс.

Пегаш өдйө быдмис. Гөныс лои шыльыд да сук. Радейтіс сійө дурны аслас козяйкакод. Марина петас керкасьыс да горөдас: «Пегаш! Пегаш!». Кролик чеччалігтыр котөртө нин нывкалы паныд. Исалө Мариналысь кияссө, эз-ө козяйкаыс вай сылы кутшөмкө чөскыдтор.

— Ак тэ, мути, дженьыд бөж, чөскыдтор радейтысь,— малыштас сійөс Марина.— Бур, мый рөзбойник каньыд сэки тэнө эз удит джагөдны. Со кутшөм мича да ыджыд лоин.

Пегаш, быттьө гөгөрвоө ошкөмсө, то риснитлас-котөртлас йөр гөгөр, то табья кокъяснас тотшкөдыштас кильчө пос вылын.

Лунысь-лун Мариналы аслас быдтасыс лои мусаджык. Локтасны нывка дорө пөдругаясыс и тшөтш нимкодьясьоны кроликөн. Некодос сійө оз төдтөмт, быдөнкөд

дась ворсыштны да дурыштны. Нывкаяс чилзёны да вётлысьёны ышмысь Пегаш бёрся.

— Пегаш, Пегаш,— óta-мёд вежмён горзёны найö.— Мудзтін миянös. Дугды пышьявныд. Лок, донукöй, татчö. Эн пов, ог öд öбидитöй. Малыштам сöмын.

Кролик чепöсйылас нывкаяс дорö, сэсся бөр заводитас котравны.

Тадзи и олісны-вылісны кузь кöсаяса Марина да дженъидик бöжа Пегаш.

Пуксис ар. Пуяс вылын вижöдісны корьяс. Марина ветлöдліс школаö. Көть гортса уджъяс учительница сетывліс уна, нывка пыр аддзыліс кад ворсыштны Пегашкөд, кодысь лунтырнад ёна бырлі гажыс.

Шойччан лунö, кор Мариналы оз вöлі ков мунны школаö, мамыс водз чуксалис нывсö:

— Марина, тэнад öд нимлун. Гашкö, гөстьясöс чукөртлам?

— Ой, ме дзикөдз вунöді. Дас öти арös тырö, да, мам?

— Сідз, донукöй, сідз. Быттьö дзик на неважөн пызан увті вöлі уялан, а со нельöд классö нин котралан.

— Мамук, а позьö мем ассьым пöдругаясöс чай юны корлыны? Галяös, Светланаös, Риммаös...

— Көдös көсьян, сійös и кор. И дедыд ордö пырав. И Груня тьötкайдлы висьтав. А ме тэныд со именнича пирөг-шаньга пöжала...

Марина пыр и энөвтис шоньд вольпасьсö, тшöтш заводитис отсасьны мамыслы. Вала петалис, картофель кулис. Бара дум вылас уси Пегашыс. Кынöмыс, көнкö, сылөн сямалö.

— Мамук, ме вердышта Пегашös и дзик пыр котөртла дедöясö, а сэсся пöдругаясöс кора.— Марина босьтис киас кроликлысь сёян дозсö, но мамыс сувтöдіс сійös.

— Кроликтö талун оз ков вердны. Ме Öльöксан дядьтö кори, начкас сійös. Нимлун кузяыд чöскыд жаркөй вöчам.

Маринаос тайо кывъясыс сэтшом ёна повзьодисны, кисыыс уси тасьтыыс.

— Ог сет! Некодлы ме ог сет ассыым Пегашос! Мыйла нө сийос начкыны? Ог сет! Оз ков меным некутшом нимлун.

Нывка кураліс тасьтїо киссьом кролик вөлөгасө, а бандзибьяс кузяыс синваыс тюрөбөн визувтїс.

— Абу өмөй жаль Пегашыс? Кутшом сийө төлка да мича. Ме сийос пыр жө дзеба, медым некод оз аддзы.

Мамыс шөйөвошліс, а сәсся шоныд кияснас кутыштїс нывкасө, фартук помнас чышкаліс синвасө.

— Мед тә ног лоас. Эн бөрд. Нимлунө оз бөрдлыны. Ме эг чайт, мый Пегашыд тәныд сэтшом муса.

— Колөкө, Пегашыд абу нин и ловья?— видзөдліс Марина мамыс вылө и котөрөн уськөдчис аслас быдтас дінө.

Мамыс ыджыда ышловзис. Сылы кыдзкө эз ло лөсьыд, мый виччысьтөг дөзмөдіс ассыыс нывсө. Марина вель дыр эз бергөдчы гортас. Мамыс тшөтш петіс гидө, көсйис видзөдлыны, мый сәні вөчө нылыс. Матыстчис өшинь дорас да чуймис: Марина Пегашсө топөдөма морөс бердас и помвыв малалө небыдик гөнөдыс.

## ПРЕМИЯ



**Ч**астө Роман ышнясьө. Быттө сийө сиктас медбур детинка. Талун локтїс школаө да парта саяс орччөн пукалысь Гриша Симпелевлы пыр и мөдіс ышнясьны да ошйысьны:

— Мамө менам талун рыська шаньга пөжаліс. Ой, чөскыд, ме, гашкө, дас шаньга сөйи. Видлы, со кынөмөй

өні на дундөма. Ме и сумкао кык шаньга пукті. Отсалан кө задачаяс решитны, өтисө тэныд сета. Видлан кутшөм чөскыд, кывтө нбылыштан.

— Оз ков. Ачылд нин чөсмась. А задачаястө аслыд ковмас решайтны, лёка юрид ыджыд.

Дөзмис Роман, урок чөжыс эз видзөдлы Гриша Симпелев вылө. Ыджыд перемена дырйиыс, мед петкөдлыны вежсө Гришалысь, дыр тяпкөдіс-сөйис рыська шаньгасө, кань моз нюліс выйөсь чуньяссө.

— Вежыд эськө петө, да ог сет.

— Ёна тай колө,— вомалис сійөс Гриша.

Та бөрын Роман ещө на дөзмис съод юрсиа Гриша вылө, коді тушанас вөлі ёна ичөтджык кузь кока Романысь. И пыр жө мөдіс нерны орччөн пукалысьсө:

Кув, ков, Симпелёв!

Рыська шаньга оз-ө ков?

Колө? На... Ог сет...

И Роман петкөдліс Гришалы выйөсь певсө. Гришалы веськодь Романлөн кикимеритчөмыс. Бара на йөрмас коркө да кевмысьны кутас. Торья нин сәки, кор задачаясыс оз артмыны. Гриша өд классын медбур велөдчысь. Дневникас сылөн сөмын «пятёркаяс».

Коли ещө кык лун. Нельөд класса велөдчысьяс, асланыс учительница Ирина Ивановна веськөдлөм улын, лөсьөдалісны плакатьяс, посныдик гөрд флажокьяс. Быдөн лөсьөдчисны ыджыдысь-ыджыд праздник кежлө. Велөдісны кыпыд сыланкывьяс, медым ноябрь 7-өд луно тайө сыланкывнас восьлавны митинг вылө, коді быд во овлө сикт шөрын, медся гажа местаас.

Роман бурасьөма нин Гриша вылө, кытшкылясьсө сы гөгөр, корө отсавны гижны флажок вылас чарла да мөлөт.

— Тэ өд бура рисуитчан, Гриша. Тшөтш вай меным отсышт, а то телевизор видзөдны сёрма. Талун миянө карысь зэв ыджыд гөстя локтө. Мамөлөн чойыс. Сікө, тө-

дöмысь, быдсяма гöснечсö меным ваяс. Эн пов, и тэнö гöститöда.

Гриша öти здукөн и рисуитис Романлы флажок вылас чарла да мөлөт. Кор эштіс рисуитöмыс, век жö öлөдіс Романös:

— Сöмын мöдысь сэсся некор эн ышнясь, эн нерсыы.

— Ог, ог... Ме öд сэки прöста дурышті.

Эз на удитны велöдчысьяс разöдчавны гортаныс, школаö пырис совхозса уборщица Паладь тьöt. Сійö мыччис учительницалы нель пельö кусыньтöм бумага лист да надзöникөн шуыштіс:

— Öндрей Михайлович тшöктис сетны.

Ирина Ивановна лыддис бумагасö, сэсся шыасис челядь дінö:

— Нолтö ланьтыштлöй. Со совхозсянь бумага ыстöмаöсь. Миян классö дзик пыр воасны гöстьяс: совхозса управляющöй Андрей Михайлович да парторг Пётр Иванович. Некод энö муналöй.

«Ме тай пышъя-а. Колökö, мамөлөн чойыс нин воис. Кутас кö юасыны учительница, висьтав, пиньыс пö висьмис»— Роман вашнитис пеляс Гриша Симпелевлы и гусьöникөн петис классысь.

Гöстьясöс виччысьны ковмис регыд. Совхозса управляющöйлөн да парторглөн киняуланыс тыдалісны кушöмкö тубрöсьяс. Челядь дружнöя здоровайтчисны школаö локтысьяскөд, сэсся ставөн пуксялісны партаяс сайö.

Парторг Пётр Иванович чолöмаліс велöдчысьясöс локтан празникөн да кыв сетис совхозса управляющöйлы.

— Тіян класса öткымын велöдчысьяс гожöмбыд отсасисны совхозлы кöрым заптігөн. Таысь совхозса уджалысьяс висьталöны налы ыджыд аттьö,— паніс ассьыс сёрнисö Андрей Михайлович.— Ми со сёрнитчим ас кежаным да медбура уджалысьяслы шуим сетны нейджыд козин.

Эз на удит управляющой помавны висьталомсö, велöдчысыяс ставон кутисны кекончасыны. Премируйтисны вит велöдчысöс. Гриша Симпелевлы сетисны выль костюм, мичаысь-мича. Онi жö коть пасьтав да которт гортад.

— Молодеч, Гриша. Батыд тэнад медся бур тракторист мян овмöсын, и тэ, тыдалö, быдман да сэтшöм жö лоан. Герой,— ошкыштит сийöс парторг.

Дженьыд кажитчис школасянь гортас туйыс Гришалы. Кутö киняулас выль костюмсö, радысла кок увсыс мусö оз кыв.

Муртса на пырис гортас, а сэнi Роман нин пукалö. Сийö уськөдчис Гришалы паныд, шевгөдис пальтосö да пыр и мөдис ошйысны.

— Видзөдлы, тётя Мотя мый меным вайис карысь. Татшöм гачыс, дерт, сиктын некодлөн абу. Гладитны пö весиг оз ков. Дас шайт, гашкө, сулалö. Вот школаын завидьтыны кутасны.

— Аддзöмыд мыйон ошйысны. Вот менсым видзөдлы костюмсö,— Гриша öдйö пасьталис совхозысь сетöм премиясö да сувтит Романлы паныдөн.— Но кызд, мича?

Роман вель дыр кывсö шуны эз вермы. Лапйөдлис синъяссö да сюся видзөдис Гриша вылö, кодöс быттö первойысь адзис.

— Да-а-а...— сöмын и артмис сылөн.— Мамыд ньöбис?

— Вот и эн тöд. Эз мам ньöб, а совхозысь премия. И Жоралы, и Петялы... А Оля да Таня Шевелевалы мича платьеяс сетисны видзяс вылын бура уджалöмсыс. Ме и мөд во гожöм бара кута юр кыскавны.

Романлы карысь вайöм гачыс эз нин онi кажитчы сэтшöм мичаөн. Думнас онi видис асьсö, мыйла гожöмнас тшөтш эз уджав видзяс вылын. Сэки эськө колөкө и сийöс татшöм мича костюмнас премируйтисны. Каникулъяс чөж Роман дөвьялис сикт кузя, луннас, гашкө, дасысьөдз купайтчис, нывпоснилы вильшасис. А таысь тай премиятö оз сетны.

Удж вылысь воис мамыс, аддзис писö выль костюмөн да чуймис.

— Гришук, кытысь нö тэныд татшöм паськöмыс? Батьыд али мый районысь вайис?

— Мыйла бать «вайис»? Ачымöс премируйтисны. Геройөн весиг нимтисны. Збыль висьтала. Медся уна лун пö уджалін тэ видз вылын, Григорий Симпелев. Пётр Иванович да Андрей Михайлович пасибö висьталісны и.

Мамыс чуп окыштіс пиыслысь плешсö, небыдик кияснас дыр кутліс Гришаöс.

— Оз тусь тэ менам, Гришук. Батьыд кутшöм радлоö, мый миян эм татшöм шань пи.

«УДИТА...»



Унаысь паныдасьлывлa тайö детинаыскöд. Сійöс ме тöда мöд во нин. Детина кызд детина. Пасьтасьö мичаа, радейтö чöскыд кампет да мороженöй. Тövъяснас любитö иславны лыжи вылын, вугравтöдзыс видзöдны телевизор. Вель частö öбидитлывлö ас дорсьыс посниджыкъясöс. Гожöмнас шоча и пыравлö гортас, то кар кузя шöйтö, то луннас дасысь купайтчас. Жораөн сійöс шуöны. Нельöд классын велöдчö. Сылы кöть абу на и дас кык арöс, а позьö сетны дас нельöс. И ёнлуннас абу öбидитöмаöсь. Сöмын вот Жора вывті... Но та йылысь тöдмаланныд бöрынджык.

Эм тайö детинаыслөн бать и мам. Эм и пöрысь баб, коді ас дорсьыс ёнджыка радейтö внуксö.

Жоралөн батыс капитан. Уна во нин ветлö пароход вылын. Мыйён Сыктыв да Эжва юясысь кылалас йиыс,

гортас оз и воливлы прамөя. Котласөдз да Архангельскөдз гырысь пурьяс кыскалө. И мамыс Жоралөн батыскөд арөдзые ветлө, пароход вылын уджалысьяслы өбед пуө.

Бать-мамыс мунөм бөрын некымын төлысь Жора олө бабыскөд. И тайө бурджык сылы: мый көсийө, сийө и вөчө. Төдө, бабыс оз кут норасыны сы вылө бать-мамыссы. Мөдарө — ошкыны кутас, бура пө оліс, кывзые, эз вильшась. И, дерт, батыс арнас бара нөобас выль велосипед либө мича костюм.

Водз таво воссис ваыс. Жоралөн бать-мамыс бара эновтисны гортнысө да мунисны пароход вылө.

Жора локтис школаысь да чуймис: керкаыс тыртөм. Бабыс сөмын өтнас. Первойсө весиг гажтөм босьтліс, бать-мамсыс дыр кежлө янсалис да... Сэсся пуксис телевизор дорө да бөр лои гажа. «И коді кужөма мөвпыштны телевизорсө, лун и вой көть видзөд, а пыр окота видзөдны», — мөвпалис ас кежас детина. И вунөдіс урокьяссө вөчөм йылысь.

Кор воис водан кад, бабыс мөдіс ропкыны:

— Тэ нө дыр на мөдан сычвидзны телевизор дорас? Кор нө урокьястө вөчан?

— Удита. Ой, бабусь, сэтшөм киноыс лөсьыд, шпионьяс йылысь.

Помасис кино. Заводитисны петкөдлыны цирк. Бабыс бара, кылө, видчө:

— Кусөд, мися... Бара тай нө он кывзые.

— Талун зэв кокни гортса уджөй. Здукөн вөча. Удита... Эн шогсы. Сөмын ичөтика видзөдышта. Тэ өд менам зэв бур.

А пызан вылын сулалысь будильник тотшкөдчис-мунис водзө, вөчис кытш бөрея кытш.

Гашкө, Жора дыр на видзөдіс циркса артистьясөс, но бабыс кусөдіс телевизорсө и стрөга шуис:

— Мун вод, синмыд куньяс нин. Аски водзджык чуксала.

Асывнас и збыльсы бабыс чуксалис детинаос мукод лунгяс серти водздзык. Но Жоралы сэтшом дыш чеччынысö, модис мелиавны бабыслы:

— Куйлышта да дзык пыр чечча. Думышта, кыдзи бурджыка решитны задачасö. А то талун Елена Митрофановна урокгяс вылын юасыны кутас.

— Сöмын дыр эн нежитчы. Менам и сёян нин дась,— небзис бабыслон сёлöмыс.

А пызан вылын сулалыс будильник тэрыба котортö водзö. Бөр унмовсис кровать вылын куйлыс детина, вунодис задачаяс йылыс.

— Но и но, тэ тай нö бара нин шкорган. Школаад сёрман. И урокгясыд вöчтöмөс. Ок-ок-ок.

— Уди-та-а...— очсалигмоз шуыштіс Жора и неокотапырыс эновтіс шонид вольпась.

Тайö луннас век жö урок вылас сійö сёрмис. Да и дневникас соді ещö öти двойка гортса удж вöчтöмыс.

Гортас локтіс сёрон нин. Школа бöрас стадион вылö кежавліс, лэччыліс видзöдлыны ойдом Сыктыв ю вылö, другыс ордö пыраліс, мороженöйон чöсмасис.

— Кöні бара сы дырасö шöйтан-а? Бабыс вися. Котортлы коть магазинö, нянь да йöv ньöб. Ужнайтныд лöо нинöмön. Деньгаыд со пызан вылын.

— Бабушка, а мороженöй мем позьö ньöбны?

— Ньöб, ньöб, сöмын öдийджык ветлы. Кынöмыд, кönкö, сямалö?

Жора аддзис пызан вывсыс виль «Огонёк» журнал, заводитіс видлавны сэтыс картинаяссö. Кор аддзис кроссворд, босьтіс киас карандаш да модис решайтны. Бара ылаліс Жора. Пукалö да жуглö юрсö.

А пызан вылын сулалыс будильник тэрмасьöмön котортö аслас тöдса туйöd.

— Ветлы нин, ветлы ньöбасьныд. Магазиныс пöдлас. Ме шойччышта неуна. Тэрмась, мися...

— Удита,— кроссворд бердыс юрсö лэптывтöг нурбыльтіс Жора.

Бабыс, тыдало, унмовсис. Эз кывсылон гөлөсыс. Жора вель дыр на пукаліс кывзысьтөм кроссворд дінын, сәсся вөлисти мөдөдчис магазинө.

Муртса петіс гортсыс и казяліс: моски кузя муно олома дядьо, а сыкод орччон дом йылын тапиктө ошпи. Жора пыр жө суөдіс ошпиөс, заводитіс вөтчыны сы бөрся. А вөрся зверь челядь моз дурө, то чепөсйылас пу выло, то сувтлас бөр кокьяс вылас. Гашкө, быдса час Жора вөтчис ошпи бөрся. Мороженөйон весиг сійөс гөститөдіс и ачыс сөйис. Кор дум вылас уси, кытчө да мыйла ыстіс бабыс, бергөдчис да котөрөн мөдөдчис магазинлань. Котөртө и бурөдө асьсө:

— Удита на, удита...

Но бара эз удит. Магазин өдзөсын өшаліс томан. Удитөмаөсь пөдлавны, абу виччысьөмаөсь Жораөс. Няньтөг да йөвтөг ковмис бергөдчыны гортас. Бур, мый мороженөйсө ещө удитіс ньөбны да сөйны.

«Удита» кывйыс унаысь на сконъявліс Жораөс. Радейтө, вөлөм, тайө кывйыс дышъястө, на дінын и бергалө.

«Удита» кыв вөснаыс детина унатор эз удит вөчны. Кор заводитчисны гоҗся каникульяс, Жора табельын лясвидзис куим двойка. Мөд во кежлө сійөс колисны нөльөд классө. Со мый вөчис «удитаыд».

## СУСЕДЬЯС



С вөд вөр шөрын, ичөтик ю бокө, овмөдчисны тэрыб пыста да кузь бөжа руч. Пыста узьліс джуджыд пу вылын. Руч керкасө стрөитіс пөрөм вужля бокө, му пытшкас.

Муртса на югдыштіс, пыста мыськис еджыд чужөм бансө, лэчтіс нырсө из вылын, сәсся жбыркнитіс-лэбзис вужля выло.

— Ручильё-чойильё, мунам уджавны, йёзлы бур вёчны.

Руч мыччис юрсё пемыд керкасыс, мудера видзёд-лис ичотик лэбач вылө.

— Ме войнас уджалі, луннас узьны кута.

— Мый нө вөчин?— юасьё пыста.

— Сиктө лэччылі, кык чипан джагөді,— ошйысис руч, а аслас синъясыс сідзи и кодзлалёны.— Пырав гөститны, дона гөсть, свежөй яйөн верда.

Мелі көть кывйыс ручлөн, да и бөжыс мича, но пыста полө сы дорө матыстчыны.

Лунтыр уджаліс пыста. То лэбзылас гажа садйө: куталас гагъясөс. То пуксьылас капуста град вылө: абу-өгырысь көчанъяс вылын лельёяс?

Мөд луннас, эз на удит мыччысьны шонді, пыста бара чуксаліс ассьыс кузь бөжа суседкасө:

— Ручильёй-чойильёй, чеччы! Мунам уджавны, йёзлы бур вёчны.

— Важ уджсьыс на ме мудз,— вом дорсө чөскыда нюлыштис руч.

— Мый нө вөчин?

— Колхознөй му вылө котөртлі баля яйөн чөсмасьны. Дарья тьөтлысь пөрысь петуксө пышйөді.

Пыста сьөлыштис скөра, сэсса лэбзис сиктө, йёзлы бур вёчны.

Коймөд луннас пыста чеччис ещө на водзджык. Гөлөс быртөдзыс чуксаліс-горзис ручөс, но пемыд керкасянь некод эз шыась.

Муртса на пыста удитис лэбзыны паськыд муяс дорө, аддзис ручөс. Сійө чеччаліс куим кок вылын да өдва кыскис няйтөсь бөжсө.

— Мый нө тэкөд, ручильё-чойильё?— повзис пыста.

— Эн нин юась,— сьөкыда ымзис руч.— Өдва удити пышйыны. Пищальысь лыйисны, тэрыб кокөс чегисны. Дарья тьөтлысь сарайсьыс вый тасьті көсий гусявны, а со мый лои...

— Йӱзлы кӱ лӱк вӱчан, аслыд сийӱ жӱ лоӱ,— шпоркнитӱ бордьяснас виж морӱса пыста да тӱрыба лӱбзис сиктлань.

## ТШАКЪЯСЛӱН ЗЫК



**Д**орыв час чӱж дугдывтӱг зӱрис. Кӱтасисны муяс да сӱнъяс, югдӱсны пуяслӱн коръяс, быттьӱ пывсянӱ ветлисны. Сӱссия кытыськӱ воис вына тӱв, чуш-чаш вӱчис кымӱръясӱс, вӱтлис найӱс парма весьтысь. Вочасӱн бӱр воссис енӱжыс. Да и шондӱыс лышкыдджыка шонтӱс. Гашкӱ, ошйысис парма-ягъяслы, юяслы да тыяслы аслас мичлунӱн.

Зӱра шоньд лунъястӱ радейтӱны тшакъяс. Мӱд лунас жӱ му пытшкысь кыпӱдӱсны ассыныс юрнысӱ еджыд дона гобъяс. Шапкаясныс налӱн мичаӱсь, быттьӱ кӱнтусь выйӱн мавтӱмаӱсь да пачӱ суйлӱмаӱсь жаритны. Гобъяс аддзисны ӱта-мӱдсӱ, кутӱсны радлыны.

— Видза оланныд, вокъяс!

— Видза оланныд, чойяс!

— Аттьӱ шоньд зӱрлы, отсалӱс миянлы ӱдйӱджык быдмыны, а то му пытшкад лӱка пемыд да гажтӱм. Вӱльнӱй светсӱ кӱть ӱнӱ аддзылам, вӱр дукнас лолыштам.

Друг кодкӱ гобъяс пиысь горӱдӱс:

— Видзӱдлӱй, видзӱдлӱй, кодкӱ со бара мусӱ вӱрӱдӱ!— ӱз на удитны тшакъяс бергӱдны юрнысӱ, а пӱль тош кодъ небыд яла пытшкысь кыпӱдчис гӱрд гоб. Пыркнитӱс юр вывсьыс лыасӱ, улӱдз копыртчылис банйӱм юра гобъяслы:

— Примитӱй и менӱ асланыд семьяӱ. Аддзад, ку-

тшөм ме ичөтик. Быдмышта да тiян кодъ жö кыз кока  
лоа. Но кыз, примитанныд?

— Примитам, примитам!— öтпырйö горöдисны  
еджыд гобъяс да сюся кутисны видзöдны выль тöдса вылö.

— Ой, кутшöм танi лöсьыд! Шондiе синмöс ёрö,  
абу му пытшкад кодъ олöмыд. И лэбачьяс гажöдöны  
миянöс, весиг йöктыны позьö,— радлис гёрд юра тшак.

Мöд луннас, кор ывлаис муртса заводитис югдыны,  
садьмисны тшакъяс да кутисны шензьины ас выланис.

— Но и но, со кызди ме быдми öти войö,— ошйисис  
медся ыджыд еджыд гоб.

— И ме...

— И ме быдми да ёнми. Видзöдлöй кöть,— чилзис пу  
бокö саймовтчöм тшак.

Друг гёрд гоб бергöдчылис мышкас и аддзис ещö куим  
тшакöс, кодъяс тöрыт танi эз на тыдавны.

— Кодъяс нö тi да кытысь татчö усинныд?— юалис  
гёрд гоб аслас суседьяслысь.

— Ме ягса путник. А орччөн сулалысьясылөн ни-  
мыс уртшак.

— А менö шуöны рыжик-пыжикöн,— кылис вöсны-  
дик гөлöс.

— Велькалим ми татчö сiдзи жö, кызди и тi.

— А миянöс öмöй энö тöдöй, со кымынөн сярвидзам  
чукөрөн?— кутисны норасыны масленникъяс.

Виж гоб, кодi садьмис узянинысь медбöрын, тiльыш-  
тис синъяссö да очсалигтырйи равöстис:

— Мый нö сэтшöма ызганныд, узыны онö лэдзöй! Чу-  
кöста кö яг пасьталаис быдмышь ассым став рöдвужöс,  
ставнытö вöтласны татысь.

— Эн выщитчы, виж гоб,— вомалис сийöс еджыд  
гоб.— Тэныд кö танi дзескыд, верман мöдлаö мунны. Ми-  
янлы и тэтöг гажа. Зэв на öд тэнад доныд ичöt.

Виж гоб зымнитис кокнас, эз кöсйи сетчыны. Тöдис,  
пикö кö воштасны сийöс еджыд гобъяс, отсөг вылö чукöс-  
тас ассыс чой-воксö.

— Зэв тай вылын ныръясыд. Ме и ачым мича. Быд вотчысь на менё аслас көрзинао пуктас. Майбыр, жаритны и пуны шогма.

— Серамнымос петкөдлин, виж гоб дядь. Ми медся мича да дона тшакъясыс,— эз сетчыны банйом юра еджыд гобъяс.— Быд пызан вылын ми меддона гостьяс. Ылі муясө весиг миянос нуоны.

Сэсся сёрнио суйсис ичотик рыжик:

— И ми, рыжикъяс, зэв чөскыдось, нинөмон абу лёкджыкось ельдөгъясысь. Сідз өд, чойяс?

— Сідз, сідз!— гөгөрбоксянь кутисны горзыны рыжик котыр.— Ми көть посниось, а донаось.

Тшакъяслысь зычитомсө кыліс гут кулан тшак да тшөтш окота лои ошйысьыштны аслас мичлунөн.

— Нолтө, видзөдлөй, тшакъяс, эм абу кодкө меысь мичаыс,— еджыд чутъяса гөрд шапкасө вывлань лэптыліс гут кулан тшак.— Коді медся ылөдз тыдалө? Бара жө ме. Тиянос, коньөръясөс, шоньд лунъясө гагъяс сөйоны, а ме дорө некод оз лысьт матыстчыны. Ме гутъясөс и гагъясөс ачым верма здукөн вины.

Скөрмис гөрд гоб, чорыд кыв шуис ошйысьысьлы:

— Мича и ылөдз тыдалан тэ, гут кулан тшак. Тайо збыль. Сөмын некодлы он ков. Вотчысьяс тэнө чужъялөны мачөс моз. Сідзкө, некытчө туйтөм. Ме со тэ кодь жө банйом юра, а быд мортлы шогма. Мунан кө миян дорысь, бурджык лөо.

— Некытчө ог мун: ме тані көзяиныс.

— О-о-о... Кыдзи ышнясьны мөдіс,— вомалисны выщитчысьөс уртшакъяс. Со буретш вотчысьяс локтоны татчө. Видзөдлам, кодөс медся водз пуктасны көрзинаас.

Гут кулан тшак повзис, саймовтчис пу сайо, мед некод оз аддзы сійөс. Ылөдз тыдалысь гөрд юр вылас пуктіс пипу кор.

Тшакъяс динө матыстчисны кык детина. Кианыс кыкнанныслөн көрзинаяс. Ичөтджык тушаа детина аддзис гөрд гоб да котөрөн уськөдчис сы динө.

— Шура, ме со бара гөрд гоб аддзи! Ой, кутшөм мича,— и пуктис тшаксө көрзинаас.

— А меным еджыд гоб скори. Со и мөд дзесбьөма. Лок татчө, колөкө, ещө на аддзам,— корис ёртсө ас динас ыджыдджык арлыда детина. Дыр найө зунясисны-корсисны дона гобьясөс.

— И менө босьтөй,— шыасис детинкаяс дорө рыжик-пыжик.— Шура бергөдчылис гөлөс шыө и дзык пыр копыртчис.

Виж гоб шогө уси, мый детинкаяс сийөс вермасны не босьтны. Но весьшөрө майшасьөма. Босьтисны и сийөс. И уртшак көрзинаө веськалі.

Детинаяс көсйисны нин водзө мунны, но Шуралы син улас уси пу бокын дрөжжитысь гут кулан тшак. Босьтис тшаксө вөсни кокөдыс да лыйис сийөн другыслы мышкас. Ошйысысь гут кулан тшакысь колины сөмын торпыригыас.

А еджыд, гөрд да виж гобьясөс, масленникьясөс, рыжикьясөс, уртшакьясөс, путникьясөс детинаяс радпырысь нуисны гортас. Бура и чөсмасисны чөскыд тшакьясөн, кодөс пуисны да жаритисны, мукөдсө солалисны. Сөмын дуль петмөныс ошйысысь гут кулан тшак өтнас коли туплясыны яг шөрын.

# ЮРИНДАЛЫСЬ

Война воясö . . . . .	3
Карса гөсть . . . . .	6
Галялөн быдтас . . . . .	8
Вежысь лоö . . . . .	11
Мишук . . . . .	13
Олялөн шонді . . . . .	15
Кор көкө көк . . . . .	18
Пирожной . . . . .	20
Другъяс . . . . .	22
Чойяс да вокъяс . . . . .	25
«Ог көйы» . . . . .	28
Но и Вася Васин . . . . .	33
Гожся луноö . . . . .	37
Арся вöрын . . . . .	40
Гөрд галстук . . . . .	43
«Пегаш» . . . . .	48
Премия . . . . .	51
«Удита...» . . . . .	55
Суседъяс . . . . .	58
Тшакъяслөн зык . . . . .	60

*Для младшего школьного возраста*

**Иван Васильевич Коданев**

## **ОЛИНО СОЛНЦЕ**

*Рассказы,  
сказки.*

*На коми языке*

**Художники В. А. Клейман,  
М. М. Погребинский**

Редактор В. А. Попов. Художественный редактор А. В. Мошев.  
Технический редактор А. Н. Вишнева. Корректор Э. С. Грегер.

Сдано в набор 10/VIII-1972 г. Подписано к печати 1/IX-1972 г. Формат  
70×90<sup>1</sup>/<sub>16</sub>. Бум. л. 2,0, печ. л. 4,68; уч.-изд. л. 3,4. Заказ № 4533.  
Тираж 3000. Цена 14 коп. Бумага № 1.

Коми книжное издательство. Сыктывкар, Дом печати.

г. Сыктывкар, Республиканская типография Управления по печати  
при Совете Министров Коим АССР.



14 коп.



КОМИ КНИЖНОЙ ИЗДАТЕЛЬСТВО • 1972